

Odömänoidi inänite Pabodo nänö cadota ante yewæmongainta

Waa quëwencæminimpa, ante

¹ Itota Codito ingante nê cædömo inte botö Pabodobo inömo inte iï cadota ante nê yewæmömo imopa. Wængonguï botö imote apænte æninque iïmainö ante aa pegacäimpa. Bitö Pabodobi gote botö pönö cædö ante watapæ apænebi ëñencædänimpa, ante angacäimpa.

² Mäninö, Wængonguï æbänö pönö cæquingä, ante watapæ apænedinque tömengä beyæ nê apænegainäni wëenëñedë pönï nâni tæiyæ waëmö yewæmongainö ante botö mäninö ante nê apænebo imopa. ³ Mäninö waa pönï nänö cæquïnö ante iinque cæcæte ante cædinque Wængonguï tömengä Wengä ingante da pönongä pongacäimpa. Tömengä iñömö waocä onguïñengä nänö baquinque Awënë Dabii wodi Pæingä inte ëñagacäimpa.

⁴ Adocä Itota iñömö botö Wengä inongä ingampa, ante tömänäni edonque acædänimpa, ante odömoncæte ante cædinque Wængonguï tæi pñænongä inte iïmai cægacäimpa. Iingä Itota Codito mönö Awënë iñömö Tæiyæ Waëmö ëwocacä inte do wæningä iñongante Mæmpo Wængonguï wæætë nanguï angä ate ñäni ömæmongacäimpa.

⁵ Ayæ adocä tönö godongämæ cædinque tömengä ëmöwo beyæ mönitö imönite Wængonguï pönö waadete cægacäimpa. Ayæ, Minitö wabæca wabæca gote apænemini ëñëninque tömämæ quëwënäni Itota Codito ëmöwo ante wede pönëninque nê ëñente cæte quëwënäni bacædänimpa, ante cædinque Wængonguï adobaï Itota

önompo inte mönitö imönite da godongä gotamönipa. ⁶ İninque tömämæ quëwënäni inänite Itota Codito, Botö gämænö pöedäni, ante aa pedinque mīnitö imīnite adobaī aa pecampa. ⁷ Mīnitö botö quīmīni badinque botö ayömö tæiyæ waëmö ewocate quëwēmīni bacæmīnimpa, ante Wængonguī cægacäimpa. İninque mīnitö Odömä iñömö quëwëninque Wængonguī quīmīni iñöminite botö, Acæmīnimpa, ante iīmaī ante yewæmömopa. Mönö Mæmpo Wængonguī tönö Awënë Itota Codito waadete pönö cæyönate mīnitö wæætë gänë pönente bacæmīnimpa, äninque yewæmömopa.

Odömä iñömö ëñacæ pöinëmopa, ante

⁸ Mīnitö æbänö wede pönēmīnii, ante tömämæ quëwënäni tededäni ëñänäni. İninque botö iñömö Itota Codito ëmöwo apænedinque Wængonguī ingante waa ate apænebopa. Wængonguī bitö adobique pönö cæbi ate odömänoidi wede pönänäni, ante apænebopa. ⁹ Wængonguī Wengä ingantedö ante watapæ apænedinque botö Wængonguī ingante në cädömo inte tömengä nänö änö ante ædæmö ewocadinque apænebo ëñänäni. Botö mänömaī cæbopa, ante në adingä inte Wængonguī iñömö edæ, Odömänoidi beyæ ante Pabodo botö imote woyowotæ incæ itädë incæ apænecampa, ante në ëñengä ingampa. ¹⁰ Edæ, Wængonguī, bitö Ao ämi ate botö ñöwo odömänoidi weca ëñacæ gobaimopa, ante Wængonguī ingante mīnitö beyæ ante botö cöwë apænebopa. ¹¹ Wængonguī Önöwoca beyæ apænebo ëñëninque mīnitö tæi pīñænte ewocacæmīnimpa, ante cæcæte ante botö mīnitö weca ëñacæboimpa, ante wæbopa. ¹² Edæ mīnitö botö wede pönönö beyæ wampo pönente bayömini botö wæætë, Mīnitö wede pönēmīnii, ante adinque adobaī wampo

pönëmo ïinque mönö pönencabo godongämä wampo pönëninque godömenque täi piñante entawengäimpa, ante pönëninque botö mïnitö ïiminite aïnente wæbopa.

¹³ Botö wabæca quëwënäni weca gote apænebo ëñëninque pancadäniya wede pönënäni badänitapa. ïinque, Botö mïnitö weca gote apæneyömo wadäni pancadäniya adobai wede pönencädänimpa, ante cædinque botö æpogamë incæ poncæ cæyömo edæ wææ cæte intapa. ïinque botö, Tæmpo poncæ cætabopa, ante yewæmömo ate ëñencæmïnimpa, ante yewæmömopa.

¹⁴ Edæ guidiegoidi incæ wadäni incæ, ocai encadäni incæ ocai ömæcadäni incæ ædänimë ïñönänite botö debe inte bai edæ tömänäni ïänite odömonte apænequënëmo ïnömo ïmopa. ¹⁵ Mänömaï beyæ mïnitö Odömä ïñömö quëwëmïni ïñömïnite botö mïnitö ïiminite adobai mönö Codito ingantedö ante watapæ apænecæte ante nangui cæinente wæbopa.

Mönö täi piñante ewocadö Codito beyænque impa, ante

¹⁶ Mönitö oodeomöni ïñömönite täno apænedinque Wængongui ïñömö mïnitö oodeoidi ïnämaï ïñömïnite ayæ adobai apænedinque, Mïnitö wede pönëmïni adinque Codito waa pönï pönö ængä beyænque quëwencæmïnimpa, ante täi piñante cægacäimpa. ïinque mänïnö Codito ingantedö ante botö ïñömö watapæ apænedinque, Wængongui täi piñante nänö cægäinö impa, ante pönente wædinque edæ guiñënedämaï inte do apænebopa. ¹⁷ Mönö wede pönëmö ïñömönte Wængongui mänïne ante odömonte watapæ apænecä beyænque mönö nö cæte quëwëmö bagamöimpa. Mänïne beyænque godömenque wede pönente badinque mönö wede pönënö beyænque quëwëmompä. ïinque docä ïñömö Wængongui beyæ yewæmöninque, “Në nö cæte quëwëngä incæ tömengä

nänö wede pönönö beyænque quëwencæcäimpa,” ante nänö yewæmongainö bai edæ do batimpa.

Mönö waocabo wentamö mongænte wæmompä, ante

¹⁸ Në wiwa cædäni guiquënë wiwa nänäni cædö beyænque wadäni edæ Wængongui nö pönö nänö apænegainö ante ædö cæte ëñenguinänii. Ìninqe Wængongui ingante në wiwa cædäni nänäni ëñenämaï ìninö ante godö pïininqe tömengä öönædë ongöininqe wiwa nänäni cædinö beyænque do pangä wædäni edonque amompä. ¹⁹ Wængongui, Botö æbodö ìmoo, ante tömämïni edonque pönö ëñencæmïn-impä, ante cædinque tömämö ìmonte odömöninque tömënäni ìnänite adobaï edonque pönö odömongä wægadänimpä. ²⁰ Wëënëñedë pönö në quëwengainäni tönö ñöwo ganca quëwëmö adobaï, Wængongui mönö në adämaï ìnongä inte æbänö quëwengäa, ante ëñencæte ante wægäimö ìnömö inte mönö tömengä nänö badon-gaincooque adinqe edæ edonque pönö acäëmpä. Edæ, Tömengä ñimpo cædämaï inte cöwë në täï pïñængä ingampa, ante ayæ, Në Wængongui ìnongä ingampa, ante wædinque mönö waocabo edonque aquënëmö ìmompä. Ìñæmpä ëñenämaï intabopa, ante ædö cæte anguii.

²¹ Wængongui ingante do ate bai ingainäni incæte waodäni tömengä ingante edæ, Bitö Wængongui ñäö ëmönömi ìmipa, ante edæ änämaï ìnönänimpä. Wængongui ingante waa ate pönente apænedämaï ìnönän-impä. Mänömaï ocai ömæcadäni bai mïmö ömædënäni bai badinque tömënäni wentamö entawënäni bagadän-impä. ²² Ocai encamöni ìmönipa, ante änäni incæte tömënäni wæætë mänömaï cædinque ocai ömæcadäni bagadänimpä. ²³ Edæ Wængongui wænämaï në Quëwen-gaingä ìñongante tömënäni wæætë godö Baa angadän-impä. Tömengä nänö ñäö ëmönö ante pïinte cæd- inque tömënäni wæætë waomö në wæwocamö mönö

ëmönö bai badöningue, öömä eñadäni nani ëmönö bai badöningue, ocagui eñadäni nani ëmönö bai badöningue, ocagui ömaadäni nani ëmönö bai badöningue tömënäni, Mönitö wængongui ingampa, ante cædönänimpa.

²⁴ Mänömaï cædäni ate wædinque Wængongui, Minitö mini cæinente wædö ante ee abo cæcæminimpa, ante da godongä wadæ godinque tömënäni baonga nani ñömæi mongænte quëwenguinque cædönänimpa. Ìninque nana gæncaya nana gæncaya nani monguënënö ante Baa ante guïñeñadamaï inte cædinque wacä ingä wacä ingä godö wiwa cædönänimpa. ²⁵ Wængongui näwangä pönï nänö apænegaïnö ante tömënäni Baa äninque mä pönëninque nani babæ apænegaïnonque ante Ao änönänimpa. Mänömaï cædönäni inte tömënäni wæætë Wængongui nänö në badongaincoo weca ædæ wææninque, Mönitö wængongui impa, ante cædinque në Badongaingä ingante edæ ëmö cæte wadæ gogadänimpa. Incæte tömengä në Badongaingä iñongante mönö waocabo inguipoga mönö quëwënedë ayæ ate müinguipo bayonte wantæpiyæ mönö quëwënedë Wængongui ingante, Bitö tömëmi toquinque pönö waa cæbi æmönipa, ante mönö apænecæimpa. Mänömaï impa, ante Amëë, ämopa.

²⁶ Mänömaï cæyönänite Wængongui, Minitö guïñeñadamaï mini toinente wædonque gobæwedäni, ante da godongä gogadänimpa. Ìninque onquiyænäni incæ, Në onquiyæmo inömo inte botö onguïñængä tönö monguënëmo imopa, ante änämaï inäni inte godö wacä onquiyængä tönö towente möwënönänimpa. ²⁷ Ayæ onguïñænäni incæ adobaï cædinque, Botö onguïñæmo inömo inte onquiyængä tönö monguënëmo imopa, änämaï inäni inte godö wacä onguïñængä tönö möinente gonga bæco bai toinente wædäni bagadänimpa. Ìninque cöwë nani waa quëwenguënënö ante Baa äninque nani onguïñæncabo inönäni inte wiwa cædönänimpa.

Mänömaï cæyönänite Wængongui eyepæ pöni godö pangä wædinque tömënäni wiwa nani cædö beyænque nämä baonga caate wæwengadänimpa.

²⁸ Wængongui ingante mönö pönente ëñengäimpa, ante tömënäni, Önonquedö ante impa, ante tedeyönänite Wængongui wæætë, Ocaidë wentamö encadömini inte edæ waomini mini wiï cæquënënö incæ ee abo cæbæwedäni, ante da godongä gogadänimpa.

²⁹ Tömënäni iñömö nö cæquinämaï inäni inte do wiwa cädänique badinque iïmaï cädänipa. Wacä ingä godö towëninque tömënäni wadäni inänite në wënæ wënæ cädänique inänipa. Mäincoo ante æinente wæwënäni inte tömënäni, Wacä gomonga ængä ingante godö piïnte adänipa. Ayæ edæ, Mönö godö wængongäimpa, ante cædinque do cädänipa. Guädö guëa piïnte cädänipa. Wacä oda cæcæcäimpa, ante ancaa cædinque tömënäni godö babæ cädänipa. Ayæ në wiwa pönëwënäni inte tömënäni, Wadäni wæcädänimpa, ante godö piïnte cädänipa. Godö wæntaa godö wæntaa tedewënäni inänipa. ³⁰ Ayæ wadäni inänite piïninque iïnäni iñömö godö babæ ante tedewënäni inänipa. Wængongui ingante piïnte cädäni inänipa. Ayæ, Tömëmoque waëmö imopa, ante nämä ængö cæte bai cædinque wadäni inänite wæantodonte bai äninque, Önonquedö cæcantedö abii, ante godö piïnte todäni inänipa. Edæ, Æbänö godömenque wënæ wënæ cæte toquimoo, ante edæ pönëë cöninque edæ nangui cädänipa. Mæmpocä tönö badä, Cædäni, äñönate tömënäni ëñenämaï cädänipa. ³¹ Mimö ömædënäni inte tömënäni ocai ömæcadäni bagadänimpa. Cæcæboimpa, äninque edæ iïnque cädämaï inönänimpa. Wacä caate wæcä adinque godö waadedämaï inönäni inte tömënäni edæ godömenque piïnäni inte cædönänimpa.

³² Mänömaï cädäni iñömö nani wænguinque

cædänipa, ante Wængongui nö pöni nänö angainö ante tömënäni önömoncaque në eññäni inte tömënäni nani wënæ wënæ cæinënonque ante cædänipa. Ayæ tömënäni wiwa nani cædö bai wadäni adobaï cædäni adinque tömënäni, Waa cæminipa, äninque në cædäni inänite waa adänipa.

2

Nöingä ante Wængongui apænte angampa, ante

¹ Tömënäni mänömaï cædänipa. Incæte bitö adobaï wiwa cædömi inte tömëmi pante wæquinque tömënäni inänite apænte ämipa. Ininque bitö wacä ingante, Bitö pante wæquinque wiwa cæbipa, ante apænte ämi inte bitö inæmpa adobaï wiwa cædömi inte edæ æbänö cæte nämä ante wææ anguïmii. ² Wiwa cædäni inänite apænte äninque Wængongui cöwë nöingä ante apænte angampa, ante edæ do eññemompa. ³ Ininque waobi önömique inömi inte bitö inæmpa tömënäni inänite apænte ämi incæte tömënäni nani cædö bai adobaï cædömi inte edæ, Wængongui botö imote pänämaï inte ata cæpocæcäimpa, ante pönëmitawo. ⁴ Bitö wiwa cæbi inte Ca ca wæquënëmi inömite Wængongui wæætë ee pänämaï inte nangui waadete pönö cæyongante bitö wæætë edæ piinque Baa ämitawo. Inæmpa tömengä, Bitö, Æmæwo wënæ wënæ cætabopa, ante wædinque botö gämænö poncæbi-impä, ante Wængongui pönö waadete cæcampa, ante pönëmiyaa.

⁵ Incæte bitö mïmö ömædëmi inte ancaa Baa äninque edæ wënæ wënæ bitö cædö ante nïmpo cædämaï inömite Wængongui nänö ængui baquïönæ iinque bay-onte tömengä ængui pöni badinque godömenque pangä wæcæbiimpa. Tömengä æbänö nö apænte angää, ante mäniñedë ate edæ edonque acæimpa. ⁶ Edæ, Tömämö mönö cægai ganca ante Wængongui eyepæ pöni pædæ

pönongä æncæmöimpa, ante dodäni nāni yewæmon-
gainö bai edæ iinque bacæimpa.

⁷ Īninque, Mönö ñäö bai entawengæimpa, ante
cædinque ayæ, Wængonguī mönö imonte waa adinque
pönö cæcä ate mönö wæwocadāmaī ewocacæimpa,
ante cædinque mönö wæntædāmaī inte ee waa cæte
quëwëmö ĩninque Wængonguī pönö cæcä ate mönö
cöwë wænāmaī quëwëmaīmompä. ⁸ Wæætë, Wængonguī
nāwangä nänö apænedö ante Baa äninque, Tömëmo
beyænque quëwencæboimpa, ante nē änäni inänite
ayæ wadäni wiwa nāni cæquinonque ante nē tee
empote godäni inänite Wængonguī ænguī badinque
godö piinte cæcæcäimpa. ⁹ Edæ mönö waocabo wænæ
wænæ cæmö adinque Wængonguī oodeomöni iñömönite
täno päninque oodeomīni ināmaī imīni iminite adobaī
päñongä nē wænæ wænæ cæmö tömämö iñömö edæ
caate wæwencæmöimpa. ¹⁰ Wæætë waa cæmö adinque
Wængonguī oodeomöni imönite täno pönö waadete
cædinque oodeomīni ināmaī imīni iminite adobaī
pönö waadete cæyongä nē waa cæmö wæætë gänë
entawëninque ñäö apäite bai entawëñömönte edæ
Wængonguī tömämö imonte waa acæcäimpa.

¹¹ Edæ mönitö oodeomöni imöni incæ mīnitö ood-
eomīni ināmaī imīni incæ Wængonguī tömämö imonte
adoyömö pönö adinque wadö wadö ate pönente cædā-
maī ingampa. ¹² Möitee wodi, ĩmaī cædäni, ante
nänö wææ angainö ante ömæmoncadäni inte wiwa
cædäni ĩninque tömengä nänö wææ angainö dæ ante
bai mänināni wæncædänimpa. Wæætë Möitee wodi
nänö wææ angainö ante do ëñente ëmoncadänäni incæte
wiwa cædäni adinque Wængonguī mäniine ante ëñenä-
maī cædäni beyænque apænte äninque pangä wæcædän-
impa. ¹³ Edæ Möitee wodi nänö wææ angainö ante

önömoncaque eñenāni inte tömēnāni nāni önömoncaque eñenō beyenque Wængonguī ayongā dicæ nō cædāni badāniyaa.

Wæætē edæ mänīne ante eñente cædāni inānite guiquēnē Wængonguī pönō angā ate tömēnāni inōmō nō cædāni bacædānimpa. ¹⁴ Edæ Möitee wodi nānō wææ angainō ante ömæmoncadāni inte oodeoidi ināmaī ināni incæ pancadāniya tömēnāni dodāni nāni wææ angainonque ante Ao ante cædinque Wængonguī nānō wææ angainō bai edæ do cædānipa. Mänōmaī eñente bai cædinque tömēnāni mīmō entawēnāni inte mänīne ante ömæmoncadāni ināni incæte nāmā nāni wææ änonque eñente cædānipa. ¹⁵ Edæ, Tömēnāni dodāni nāni wææ angainō eñēninque waa cædāni inte tömēnāni Wængonguī nānō wææ angainō bai do entawēnānipa, ante edonque acæimpa. Mīmō entawēnāni inte tömēnāni nāni caboque godongāmæ pönēninque wēnæ wēnæ nāni cædönō ante nāēmæ apænte wææ änānipa. Ayæ wæætē waa cædāni ate tömēnāni nāēmæ apænte ñimpo cædānipa.

¹⁶ Codito ingantedō ante watapæ eñengaīmo inte botō iīmaī ante apænebopa. Wængonguī angā eñente cædinque Itota Codito wæætē waomō mönō awēmō entawēnō ante edonque pōnī adinque apænte ancæcāimpa. Tömēngā nānō apænte anguiōnæ iīnque bayedē edæ mäninō ante botō yewæmonte apænedō bai edæ iīnque bacæimpa.

Möitee nānō wææ angainta adinque oodeoidi wii eñēnāni

¹⁷ Bitō inōmō edæ, Oodeobo inōmo imopa, ante ämipa. Ayæ, Möitee wodi nānō wææ angainta nē eñēmo inte botō Wængonguī ayongante waa quēwēmo imopa, ante edæ nāmā ængō cædinque ämipa. ¹⁸ Wængonguī æbānō angāā, ante do eñēmipa. Ayæ tömēngā nānō wææ angainō ante do eñēmi inte bitō, Quinō waa i, ante do

ēñēninqe Ao ante æmipa. ¹⁹ Bitö, Wadäni babetamö bai ēwocayönänite botö töö æmænte mäobo godänipa. Wēmō iñömō quēwente bai adāmaī iñönänite botö iñömō, Acæmīnimpa, ante tica ēnente bai odömonte apænebopa, ante edæ, Nāwangā ämopa, ante bitö apænebitawo. ²⁰ Ayæ adobaī, Mönö Möitee wodi nänö wææ angainö ante ēñente beyænque mönō ēñenguēnēnō ante entawēninqe mönō nō cæquēnēnō ante adobaī tömänö ante entawengæimpa, ante bitö pönēmitawo. Ayæ mänö-mainö ante bitö pönēnō beyæ bitö, Nē oda cædäni inänite botö nē töingā odömömo imopa, ante pönēmitawo. Wēñænäni bai wædænque ēñēnāni iñönänite botö nē odömonte apænebo imopa, ante pönēmitawo.

²¹ Iñæmpa mänömaī inömi inte bitö edæ dicæ nämä odömonte apænete ēñēmitawogaa. Wadäni inänite odömonte apænedinque, Awēmö ænämaī iedäni, ante odömonte apænedömi inte tömēmi awēmö æmitawo. ²² Bitö wadäni inänite odömonte apænedinque, Nänöogängä ināmaī iñongante godö guëa mönämaī ië, ante nē wææ ämi inte bitö adobaī wacä tönö guëa mömitawoo. Ayæ, Wængonguī ingampa, ante nāni badöinca ante nē pīimi inte bitö edæ tömēnāni nāni apæneincönē go guidinque edæ ö æmitawoo. ²³ Iñæmpa bitö, Möitee wodi nänö wææ angainö ante botö ēñente cæbo imopa, ante tededinque nämä ængö cædömi inte edæ mänīne ante ēñēnāmaī cæbi adinque wadäni wæætē Wængonguī ingante waa adāmaī inänipa töö. ²⁴ Edæ, “Mīnitö cædinö beyæ oodeoidi ināmaī ināni incæ Wængonguī emöwo ante godö babæ ante wēnæ wēnæ änewēnänipa,” ante tömengä beyæ dodäni nāni yewæmongainö bai do batimpa.

²⁵ Edæ Wængonguī nänö wææ angainö ante ēñente cæbi ininque bitö, Nāwä oodeobo imopa, ante nē öö togæimi badinque waa imaimpa. Wæætē edæ ēñēnāmaī

cæbi ininque oodeo ināmaī ingā bagäacä ingā bai bitö iñömö edæ do babaīmipa. ²⁶ Oodeoidi ināmaī ināni guiquënë bagäadāni ināni incæte tōmēnāni Wængonguī nānō wææ angainō ante ēñente cædāni ininque Wængonguī ayongā tōmēnāni do eö togæināni bai inōnāni inte oodeoidi bai inānipa. ²⁷ Bitö iñömö Möitee wodi nānō wææ yewæmongainta mänimi inte nē eö togæimi imitawo. Bitö mänōmaī imi incæte ēñēnāmaī cæbi iñōmi wacā wæætē bagäacä inongā inte ēñente cæcä ininque tōmengā ēñente nānō cædō beyænque Wængonguī wæætē bitö imite apænte äninque pancæcäimpa.

²⁸ Iñæmpa oodeo ēñagaingā inte baö beyænque oodeocä ingā incæte tōmengā wii mänōmaī ingā beyænque nāwā oodeocä ingampa. Adobaī nē eö togæingā iñömö baonque nānō eö togæinō beyænque tōmengā Wængonguī ayongā ædæmō eö togæingā bai wii ingampa. ²⁹ Wængonguī Önöwoca ingante nē ewocacä guiquënë tōmengā iñömö edæ nāwā oodeo bai badinque Wængonguī wēñængā ingampa. Edæ Möitee wodi nānō wææ yewæmongainō ante ēñente eö togæinque waocä tōmengā wentamō nānō entawēnō dicæ wido cæquiringä. Wængonguī Önöwoca guiquënë pönō wido cæcä beyænque waocä wæætē waēmō entawengampa. Mänōmaī entawengā ingante wadāni waa adāmaī ināni incæte Wængonguī wæætē, Bitö waa entawēmi abopa, äninque tōmengā ingante waa apænecampa.

3

¹ Ininque oodeocä iñömö edæ, Oodeobo imopa, ante toquēnengā ingantawo. Ayæ adobaī, Botö eö togæimo imopa, ante toquēnengā ingantawo. ² Ao ämopa. Nē oodeoidi inōnāni inte tōmēnāni cōwē nanguī toquēnēnāni inānipa. Edæ Wængonguī apænecä ēñengaināni inte

edæ oodeoidi tömengä nänö apænedö ante nē man-
gainäni inte nē toquēnēnāni inānipa. ³ Mänömaï i in-
cæte pancadāniya iñömö edæ wede pönēnāmaï inānipa.
İninqe mönö æbänö anguii. Tömēnāni nāni pönēnā-
maï inö beyænque Wængongui tömēnāni inānite dicæ
ñimpo cædinque ædæmö aadāmaï ingantawogaa. ⁴ Ædö
cæte mänömaï inguii. Mönö waocabo tömämö nē babæ
apænemö iñömonte Wængongui iñömö nö pōni cæcä
ingainö anguēnē. Edæ tömengä beyæ iimaï ante yewæ-
mongatimpa.

“Wængongui bitö æbänö apænebii, ante apænte ancæ
cædāni incæte tömēnāni, Wængongui nö pōni
ante apæncampa, ante edonque acædānimpa.

Bitö nē tæi emömi inte edæ bitö imite nē apænte ancæ
cædāni inānite näëmæ edæ wææntodonte bai
cædinque edæ gänä cæcæbiimpa.”

Ante nāni yewæmongainö bai edæ bacæimpa.

⁵ Waodāni mä pönēninque iimaï ante tedewēnānipa.
Mōnitö wiwa cæyömönite Wængongui nö cæcä ad-
inque wadāni, Wængonguinque nē nö cædongä ingampa,
ante godömenque edonque acædānimpa. İninqe wiwa
cæyömönite Wængongui quīnante piinte pangää, ante
tedewēnānipa. Mänömaï tedewēnāni adinque mönö
wæætē æbänö anguēnēmö imöö. İñæmpa waodānique
nāni änewēnö bai dicæ anguēnēmö imongaa. ⁶ Ædö cæte
mänömaï änewenguii. Mäninö nāni tedewēnö näwangä
i bai ingui-poga quēwēmö imonte Wængongui apænte
änāmaï inguēnengä.

⁷ Wadāni guiquēnē iimaï ante tedewēnānipa.
Wængongui cōwē näwangä ante apæneyongante botö
babæ apænebo adinque wadāni, Wængonguinque
näwangä ante apæncampa, ante tömengä ingante
godömenque waa acædānimpa. İninqe babæ botö
apænedö beyænque Wængongui godömenque ñäö

apäite bai ëmongä ingampa. Ìninqe, Bitö nê wënæ wënæ cæbi imipa, ante Wængonguï quinqante botö imote apænte angää, ante tedewënänipa. ⁸ Tömënäni, Wængonguï ingante godömenque waa acädänimpa, ante mönö godömenque wënæ wënæ cæcäimpa, ante tedewënänipa. Tömënäni näni tedewënö näwangä i bai mönitö adobaï ante ancädömönimpa. Edæ, Tömënäni näni tedewënö bai edæ Pabodoidi adobaï ante apænedänipa, ante pancadäniya pönö wënæ wënæ ante babæ apænedänipa. Mänömaï ante nê apænewënäni inänite päninqe Wængonguï nö cæte pangampa.

Tömämö mönö pante wæquinque wentamö mongæmompä

⁹ Ìninqe æbänö ante anguï. Minitö oodeoidi inämaï önömïnique inömïnite mönitö möni oodeocabo dicæ godömenque waa pönï imöniyaa. Inæmpä mönitö oodeomöni incæ minitö oodeomïni inämaï imini incæ tömämö nê wënæ wënæ cædömö imompä, ante do odömonte yewæmömöni abaiminipa. ¹⁰ Edæ iïmaï ante Wængonguï beyæ ante ämotamini ante bai yewæmongatimpa. “Nê nö cædongä inömö edæ dæ angampa.

Adocanque incæ edæ dæ angampa.

¹¹ Nê ëñente pönengä inömö edæ dæ angampa.

Wængonguï ingante ante nê diqui diqui minongä inömö edæ dæ angampa.

¹² Tömänäni edæ oda cæte wapiticæ godinque,

näni waa cædämaï incaboque badänitapa.

Nê waa cædongä inömö edæ dæ angampa.

Adocanque incæ edæ dæ angampa.

¹³ Waodäni inänite wænoncæte ante ææ ænete bai ëmen-

cadinque, tömänäni babæ ante enguënëwate tedewënänipa.

Edæ tæntæ tömëmæ ënete bai, Wæmongäimpa, ante ënedänipa.

- ¹⁴ Tömänäni piinte nāni tedewēnō beyænque moncapæ tī nā bai enguēñewadānipa.
- ¹⁵ Tömänäni wænonguīwaque pogodo goquīwaque ēwadānipa.
- ¹⁶ Tömänäni nē godō wänönāni inte mǎincoo wido cæte wodii godāni ate edæ miī quēwēnāni ponte ad-inque caate bai wæwēnānipa.
- ¹⁷ Nē piinte cædōnāni inte tōmēnāni Wængonguī taadō tōmengā gānē entawente nānō godōnō ante adāmaī inte cædānipa.
- ¹⁸ Tömänäni, Wængonguī ingante mōnō guīñente ēñengæimpa, ante pōnēnāmaī inānipa.”
Ante dodāni nāni yewæmongainō bai impa.

¹⁹ Æcānō Mōitee wodi nānō wææ angainō ante nē ēñente quēwenguēnēna inaa tōmengā beyænque ante wææ yewæmongatimpa. Mānōmaī i beyæ, Botō eyepæ cæbo imopa, ante mōnō ædō cæte anguīi. Edæ guīñēnete mōnō pæ wēenecæimpa. Ayæ inguipoga tōmāo quēwēmō tōmāmō Wængonguī nē apænte angā weca ongōninque edæ, Æbānō cætaboo, ante Wængonguī ingante mōnō edonque apænequēnēmō imopa. Mānōmaīnō ante edæ do ēñēmompā. ²⁰ Mānōmaī beyæ Wængonguī, Mōitee wodi nānō wææ angainō ædāmō ēñente cæbi beyæ bitō botō ayōmo nē nō cæbi babipa, ante adocanque ingante edæ ānāmaī incæcāimpa. Wæætē mǎnīne nānō wææ angainō ēñente beyæ mōnō, Nē wēnæ wēnæ cæmō imopa, ante edonque amompā.

Mōnō wede pōnēnō beyænque nō cæte quēwēmompā, ante

²¹ Wīi Mōitee wodi nānō wææ angainō ante ēñēmīni beyæ wæætē edæ Wængonguī incæ pōnō badongā beyænque mōnō tōmengā ayongā nō cæmō bamompā, ante ñōwo pōnī odōmongatimpa. Dodāni Mōitee wodi tōnō Wængonguī beyæ nē apænegaināni iñōmō, Iincayæ

ate mänömaï bacäïmpa, ante do yewæmongadänimpa. ²² Wængongui pönö badongä ate mönö në wede pönëmö iñömö Itota Codito ingante mönö wede pönënö beyænque edæ tömämö tömengä ayongä nö cämö bamompa. Edæ mönö adoyömö ingaimö inte önömonque imompa. ²³ İnıne mönö tömämö wënæ wënæ cämö inte Wængongui nänö ñäö bai quëwëñömö guicæte ante cædinque wiï eyepæ cämö inte wiï guimompa. ²⁴ Incæte Itota Codito ængä beyænque abæ tawænte gote bai quëwëmö iñömonte Wængongui önonque änämaï inte waadete pönö badongä ate mönö tömengä ayongä nö cämö bamompa. ²⁵ Wængongui iñömö Itota Codito ingante da pönöninge, Tömengä mınıtö wënæ wënæ cædo ante teëmente wængä beyænque botö wæætë piyænë cædinque mınıtö imınıte pänämaï incæboimpa, ante cægacäimpa. İnıne tömengä, Mänömaï pönö cæbo ate mınıtö, Itota wepæ mönö beyæ pe tæ pe tæ wæænimpa, ante wede pönëninge wede mını pönënö beyænque quëwencæminimpa, ante pönö cægacäimpa.

Mänömaï cædinque Wængongui wëenëñedë mönö waocabo mönö wënæ wënæ cægainö ante ee adınque në pänämaï ingaingä incæte edæ, Botö cöwë nöingä ante apænte änömo imopa, ante ëñencæminimpa, ante odömongacäimpa. ²⁶ İnıne, Wængongui në nö cæcä inongä ingampa, ante mönö acäimpa. Ayæ adobai, Itota ingante në pönëmö iñömonte Wængongui në panguë-nengä ingä incæ mönö imonte ata cæpodınque pönö badongä ate mönö wæætë tömengä ayongä edæ në nö cämö bamompa, ante mönö acäimpa. İnıne tömengä mänömaï cædinque tömengä nö nänö cædo ante odömoncæte ante ñöwo cægacäimpa.

²⁷ İnıne mönö waocabo iñömö nämä ængö cæte bai cædinque mönö, Nämä cædinque nö cämö bamompa,

ante ædö cæte anguimöö. Ìñæmpa mänömaï äninque cædämaï ingæimpa. Quinante nämä wii ængö cæquii, ante wæminitawo. Möitee wodi nänö wææ angainö ædæmö ëñente cæmö inte bai mönö, Tömëmö cætamompa, ancædömöimpa. Incæte ædæmö ëñente dicæ cæmongaa. Wæætë tömengä ingante wede mönö pönënö beyænque tömengä ayongä nö cædömö bamompa, ante adinque mönö, Tömëmö cætamompa, ante ædö cæte anguii. ²⁸ Ìñæmpa waocä Wængongui nänö wææ angainö ante ëñente cæcä incæ wii tömengä nänö ëñente cædö beyæ nè nö cæcä bacampa. Wæætë wede nänö pönënö beyænque Wængongui ayongä edæ nè nö cæcä bacampa, ante do edæ apænebo ëñëmaïminipa.

²⁹ Oodeomöni iñömönite Wængongui mönitö Wængongui inongä ingampa. Oodeomïni inämaï imïni guiquënë, Wii mönitö Wængongui ingampa, ante pönëminitawo. Ìñæmpa oodeomïni inämaï iñömönite adocä Wængongui mïnitö Wængongui ingampa. ³⁰ Edæ adocanque Wængongui inongä ingampa. Ìninque nè ëö togæimöni imöni möni wede pönënö beyænque tömengä pönö badongä ate tömengä ayongä edæ nö cæmöni bamönipa. Adobai bagäamïni mïni wede pönënö beyænque Wængongui adocanque inongä inte pönö badongä ate mïnitö adobai tömengä ayongä nö cæmïni bamïnipa. ³¹ Mönö pönënö beyænque impa, ante apænedinque mönitö Wængongui nänö wææ angainö ante dicæ wëä godonte bai cæmöniyaa. Wii mänömaï cæmönipa. Wæætë mänömaïnö ante apænedinque tömengä nänö wææ angainö ante Ao äninque mönitö, Ëñeedäni, ante odömönte apænemönipa.

4

Abadöö wodi æbänö cægacäi, ante pönengæimpa

¹ Mäninö ante mönitö mämæ Abadäo wodi iñömö æbänö ante eñengacäi, ante mönö ñowo pönente apænecäimpa. ² Abadäo wodi në eñente cæcä ingaingä incæte tömengä nänö eñente cædö beyænque dicæ nö pönï entawengä bacantawogaa. Mänömaï cædinque nö cæcä bagacäimpa, ante näwangä i bai tömengä waodäni eñeñönänite, Waa cæbo imopa, ante do ancægacäimpa. Incæte tömengä Wængongui eñeñongante mäninö ante cöwë änämaï inguënegä ingacäimpa. ³ Wængongui æbänö ante apænecä eñente yewæmongadäni, ante aminii. Edæ iïmaï ante apænecä eñente yewæmongadänimpa. “Wængongui nöingä ante apænecampa, ante Abadäo wede pönengacäimpa. İninqe tömengä wede nänö pönönö beyænque Wængongui wæætë edæ, Botö ayömo Abadäo në nö entawengä ingä abopa, angacäimpa,” ante yewæmongadänimpa.

⁴ Edæ wadäni beyæ waocä nanguï cæcä ate tömënäni debe badinäni inte edæ, Önonque pönömöni æe, ante ædö cæte anguinänii. İñæmpa wii önonque godonte impa. Wæætë tömengä nänö nanguï cædinö beyænque paga ante në godonguënenäni inte awënëidi, Bitö nanguï cæbitapa, ante godönäni ængampa. ⁵ Wængongui guiquënë önonque pönö cæcä æmöimpa. Waocä wiwa cæcä incæ wede pönengä adinqe Wængongui pönö badongä ate tömengä Wængongui ayongante wæætë nö cæcä bacampa. İninqe waocä waa cædämaï incæ edæ wede pönengä adinqe Wængongui wæætë tömengä ingante pönö badöninque, Nö pönï bitö entawenguinque bitö wede pönëmi abopa, angampa. ⁶ Waocä waa cædämaï iñongante Wængongui pönö badongä ate tömengä Wængongui ayongä nö pönï entawengä ininqe tömengä watapæ quëwencæcäimpa, ante apænedinqe Dabii wodi

adobaï ämotamini ante baï yewæmongacäimpa.

⁷ Adocä yewæmöniñque,

“Waadäni ëñenämaï cädäni inänite Wængonguï pönö
ñimpo cæcä ate

tömänäni wæætë watapæ quëwencädänimpa.

Edæ tömänäni ëñenämaï näni cädö ante ö ænte mao tee
moncate baï cæcä adinque nanguï tocädänimpa.

⁸ Æcänö ingante Wængonguï, Bitö pante wæquinque
wënæ wënæ cæbipa, ante cöwë püinte änä-
maï ingä ïinque mäningä waocä wæætë nanguï
tocæcäimpa.”

⁹ Ante Awënë Dabii wodi, Eö togænänänique tocädän-
impa, ante dicæ yewæmongantawogaa. Bagäadäni adobaï
tocädänimpa, ante ancæte ante yewæmongacäimpa.
Abadäo wodi Wængonguï ingante wede nänö pönönö
beyænque Wængonguï, Botö ayömo Abadäo në nö
entawengä ingä abopa, angacäimpa. Mänömainö ante
edæ botö do yewæmömo abaïminipa. ¹⁰ Abadäo wodi
æbänö engæñongante Wængonguï mänömaï angacäi.
Dicæ eö togæningä ïñongante angantawogaa. Wæætë
bagäacä ïñongante angacäimpa. ¹¹ ïinque, Abadäo
bagäacä inte wede pönengä beyænque botö pönö badömo
ate nö cæcä bacampa, ante ëñencädänimpa, ante cæd-
inque Wængonguï angä eö togænte bagacäimpa.

Mänömaï cæcä beyæ mïnitö bagäamini inte wede
pönëmïni ïñömïni Abadäo wodi mïnitö wæmængä baï
bagacäimpa. Abadäo wodi päïmïni baï wede pönëmïni
adinque Wængonguï adobaï, Nö entawëmïni bamïni
acæboimpa, ante pönö badongacäimpa. ¹² Mönitö
wæmæ Abadäo wodi doyedë bagäacä ingäñedë incæ
wede pönengä ingacäimpa. Möni idægocabo ïñömö në
eö togæïmöni inte edæ tömengä wede pönente nänö
cægongainö adodö tee empote gomönipa. ïinque

mäninönö möni wede pönente godönö gomöni beyænque möni ëö togæncabo wæmængä adocä Abadäo wodi ingacäimpa.

Mönö wede pönönö beyænque Wængongui nänö angainö ante cæcampa, ante

¹³ Wængongui, Inguipoga incæ bitö nê ænguimi incæbiimpa, äninque Abadäo wodi tönö tömengä nänömoidi inänite pönö angä ængadänimpa. Mänömainö äninque Wængongui dicæ, Botö wææ angainö ante ëñente cædänique æncædänimpa, ante angantawogaa. Wæætë edæ wede pönente tömengä ayongä nö entawënäni badäni beyænque Wængongui, Inguipoga incæ pönömo æncæminimpa, ante apænegacäimpa. ¹⁴ Wængongui dicæ, Botö wææ angainö ëñente nê cædänique nê ænguinäni inänipa, ante angantawogaa. Edæ mänömainö angä bai mönö wede pönönö ante önonque pönencædömöimpa. Tömengä nänö angainö incæ wo ewente bai bacædönimpa. ¹⁵ Edæ mäninö tömengä nänö wææ angainö ante ëñenämai cædäni beyænque Wængongui ængui badinque pangampa. Wæætë wææ änämai inte bai Wængongui, Botö wææ angainö ante ëñenämai cæbipa, ante ædö cæte anguingää. Edæ dæ ancædönimpa.

¹⁶ Mänömai beyæ Wængongui, Botö waadete pönö cædö beyænque æminipa, ante edonque acäimpa, ante cædinque Abadäo wodi wede nänö pönönö beyænque ante, Pönömo æncæminimpa, angacäimpa. Mönitö Möi-tee wodi nänö wææ angainö ante nê ëñëmöni inömönite wii adomönique imönite angacäimpa. Wæætë Abadäo wodi nänö wede pönengai bai adobai wede pönömö inömonte mönö tömämö imonte Wængongui, Cöwë pönömo æncæminimpa, angacäimpa. Edæ mönö wede pönencabo inömonte Abadäo wodi tömämö wæmængä bai ingacäimpa. ¹⁷ Wængongui edæ do wængainäni inänite

pönö cæcä ate tömënäni iñömö ñäni ömæmonte edæ miinäni quëwënanipa. Dæ angaincoo incæ tömengä do badongä ate edæ a ongoncoopa. Wængonguï mänö-maï nê badongä iñongante Abadäo wodi tömengä ingante nê wede pönengä ingacäimpa. İninqe Wængonguï, “Abadäo ëñëmi. Botö pönö badömo ate bitö päinäni yebëninque wacabodäni nani cabo wacabodäni nani cabo nanguï inäni iñönänite edæ bitö adobique tömënäni wæmæmi incæbiimpa.” Ante Wængonguï beyæ ante yewæmongatimpa. İninqe Wængonguï ayongante mönö wede pönëmö iñömonte Abadäo wodi mönö wæmængä bagacäimpa.

¹⁸ Tömengä ingante, “Bitö päinäni edæ mänimpodäni bacädänimpa,” ante Wængonguï do angacäimpa. Mänö-mainö angä ëñëninque, Ædö cæte baquïi, ante wædongä incæ Abadäo wodi, Wængonguï cöwë cæcä beyæ watapæ bacäimpa, ante wede pönengä ingacäimpa. İninqe tömengä wede nänö pönënö beyænque “wacabodäni nani cabo wacabodäni nani cabo nanguï inäni bayönänite tömënäni wæmængä” Abadäo bagacäimpa.

¹⁹ Tömengä, Botö picængadebo wodo tiëë wadepo quëwengäimo inte edæ botö baö wænte bai ëñabo inte edæ ædö cæte wëñæ tapæiquimoo, ante ëñengacäimpa. Ayæ, Tada adobai wëñæ cöwë mänämaï ingaingä inte picængadecä badinque ædö cæte wëñæ manguingäa, ante pönengacäimpa. Incæte mäninö nänö wædö beyænque guïñëñadämaï inte Abadäo wodi Wængonguï nänö äninö ante godömenque pönengacäimpa. ²⁰ Tömengä, Wængonguï wabänö cæbaingäa, ante wædämaï inte wæætë Wængonguï nänö, Cöwë pönö cæcæboimpa, äninö ante wede pönengacäimpa. Ayæ, Wængonguï bitö ñäö entawëmi inte täi ëmonte waa cæcæbiimpa, ante godömenque täi piñænte entawëninque Abadäo wodi wede

pönengacäimpa. ²¹ Edæ, Wængonguï nê tæï piñænongä inte, Cöwë cæcæboimpa, ante nê angaingä inte edæ cöwë cæcæcäimpa, ante Abadäo do ëñëninque edæ wede pönengacäimpa. ²² Tömengä mänömaï wede pönengä beyænque Wængonguï, Abadäo bitö nö entawëmi ïmi abopa, angacäimpa.

²³ Mänine, Bitö nö cæbi ïmi abopa, ante nänö angäine iñömö wïi tömengä beyænque yewæmongatimpa. ²⁴ Wæætë mönö beyæ adobaï yewæmongatimpa. Edæ, Mönö Awënë Itota ingante Wængonguï angä ñäni ömæmongacäimpa, ante nê angaingä ingante wede pönëmö iñömonte Wængonguï, Botö ayömo mïnitö nö cæmïni ïmïni abopa, ante badongampa. ²⁵ Wënæ wënæ mönö cædö beyænque mönö Awënë Itota ingante Wængonguï pædæ godongä wængacäimpa. Ayæ mönö beyæ ante cædinque tömengä mönö Awënë Itota ingante, Bitö nê nö cædömi inte ñäni ömæmömi beyænque tömënäni botö ayömo nö entawënäni bacædänimpa, ante cædinque angä ñäni ömæmongacäimpa.

5

Wængonguï badongä ate mönö nö cæmö bamompa

¹ Mönö wede pönënö beyænque Wængonguï pönö badongä ate mönö tömengä ayongante edæ nö cæmö bamompa. Ìninqe mönö Awënë Itota Codito nänö cægainö beyænque Wængonguï piyænë cæcä ate mönö tömengä tönö godongämæ gänë entawente quëwëmompä. ² Mönö wede pönënö beyæ adocä Codito mönö ïmonte pönö ænte mämongä ate Wængonguï waadete pönö cædinque mönö ïmonte ængampa. Ayæ Wængonguï nê ñäö ëmongä weca ongöñömö tömengä pönö badongä ate mönö godongämæ ñäö ëmonte mönö watapæ bacæïmipa, ante wede pönëninque tomompa.

³ Ayä wii mäninque beyä tomompa. İñäempa, Waocä nänö wæntädämaï inte ee cæquinque caate wæcampa, ante ëñëmö ininque mönö caate wæmö incæte caate mönö wädö beyä adobaï tomompa. ⁴ Ayä nê wæntädämaï inte ee cæmö adinque mönö Wængongui ayongä nê waa cæmö edæ bamompa. Mänömaï bamö ininque mönö, Watapæ bacäïmpa, ante pönente tomompa. ⁵ Mänömainö ante nê pönente tomö iñömö edæ mönö ænguënönö ante do æninque mönö guingo imonte wädämaï imompa. Edæ Wængongui tömengä Tæiyä Waëmö Önöwoca ingante da pönöninque tömengä nänö waadete pönönö adobaï do pönongä æninque mïmönë entawëmomp.

⁶ Edæ iïmaï impa. Mönö aquïimö pönï inömo inte, Ædö cæte cæmöö, ante wæyömonte mönö Codito iñömö eyepæ pönï pöninque, Minitö Wængongui ayongante wiwa cæmini iminipa, ante adinque wiwa mönö cædö ante teëmente wæätë wængacäïmpa. ⁷ Waocä guiquënë wacä nê nö cædongä ingä adinque tömengä beyä wæätë dicæ wænguingäa. Incæte, Nê waa cædongä wæätë quëwencæcäïmpa, ante cædinque adocanque adocanque wabänö Ao ante tömengä beyä wæätë wæmainänipa. ⁸ Incæte, Wængongui mïnitö iminite nangui waadete pönengampa, ante odömoncæte ante cædinque mönö Codito iñömö nê wënæ wënæ cæmö iñömonte mönö beyænque wæätë wængacäïmpa. ⁹ Codito wepæ mönö beyä pe tæ pe tæ wææ beyænque mönö Wængongui ayongante nö entawëmö do batamompa. Codito mönö beyä mänömaï wængaingä inte cöwë godömenque cæcæcäïmpa.

Ämo ëñëedäni. Wængongui nê pïinte panguënegä iñongante adocä Codito gä pe æmpote ængä beyænque Wængongui wæätë mönö imonte edæ ata cæpocä quëwencæmöïmpa. ¹⁰ Mönö edæ Wængongui tönö mönö

godongämæ piincabo iñömonte tömengä Wengä mönö beyæ wæætë wængä beyænque mönö Wængongui tönö godongämæ piyænë cämö bagamöimpa. Mönö Wængongui tönö godongämæ piyænë cämö ininque tömengä Wengä iñömö cöwë godömenque cæcæcäimpa. Ämo ëñeedäni. Tömengä adocä do wængaingä inte ñäni ömæmonte miingä quëwëninque mönö imonte ængä beyænque mönö wænämaï inte cöwë quëwencämöimpa. ¹¹ Ayæ mönö godömenque iïmainö ante ëñengäimpa. Mönö Awënë Itota Codito ængä beyænque Wængongui piyænë cæcä ininque mönö ñöwo Wængongui nempo quëwëninque edæ Itota Codito beyæ ante watapæ to-mompa.

Tänocä Adäo wodi bai Codito adobai Tänocä ingampa

¹² Docä mäemæ adocanque tänocä incæ ëñënämaï cæcä ininque mönö wënæ wënæ cæpämö inguipoga do pongatimpa. Ayæ tömengä nänö ëñënämaï cægainö beyænque në wæwocacä bagacäimpa. Tömengä wënæ wënæ cæcä ingaingä bai mönö tömämö adobai në wënæ wënæ cämö imö ininque edæ mönö waocabo tömämö në wæwocamö edæ do bagamöimpa. ¹³ Edæ wëenëñedë Möi-tee wodi nänö wææ änämaï iñedë incæ waodäni do wënæ wënæ cædäni ingadänimpa. Wënæ wënæ cædäni incæte Wængongui, Botö wææ änö ante ëñënämaï cæmïnipa, ante ædö cæte apænte anguingää. Iñæmpa mäniñedë ayæ wææ änämaï ingacäimpa. ¹⁴ Në Ponguingä, ante dodäni nani në angaingä iñömö Tänocä nänö ingai bai docä Adäo wodi adobai tänocä ingacäimpa. Incæte Adäo wodi Wængongui nänö wææ änö ante ëñënämaï cæd-inque wënæ wënæ cægacäimpa. Wæætë Wængongui edæ Möi-tee wodi nänö quëwenganca wææ änämaï iñongante Adäo wodi pæinäni guiquënë wënæ wënæ cædäni incæte tömengä nänö ëñënämaï cægai bai wiï adobai ëñënämaï

cægadänimpa. Incæte tömënäni në wæwocadäni inte wægadänimpa.

¹⁵ Incæte Wængongui nänö wææ angainö ante adocanque nänö ëñënämaï cægaï baï Wængongui nänö pönongai iñömö wii adobaï impa. Edæ adocanque nänö ëñënämaï cægaï beyænque nanguï inäni inte wængadänimpa. Incæte Wængongui guiquënë nanguï pönï waadete pönö cædinque Itota Codito ingante da pönongä pöninque tömengä adocanque inongä waadete eyepæ pönï pönö cæcä ate mönö nanguï pönï imö inte quëwëmompä. ¹⁶ Onguiñængä adocanque wënæ wënæ nänö cægaï beyæ në wæwocadäni bagadänimpa. Wængongui nänö pönongai iñömö edæ wii adobaï impa. Adocanque nänö adopoque ëñënämaï cægainö ante adinque Wængongui tömengä ingante apænte äninque edæ, Bitö tente wæquinque impa, angacäimpa. Wæætë Wængongui nänö wææ angainö ante ëñënämaï wæætë wæætë cæmö incæte tömengä, Botö ayömo mini nö entawenguinque impa, ante önonque pönongä ænte entawëmompä.

¹⁷ Waocä adocanque incæ Wængongui nänö wææ angainö ante ëñënämaï cæcä ininque tömengä adocanque nänö ëñënämaï cægaï beyænque mönö wæwocamö do bagamöimpa. Wængongui guiquënë godömenque eyepæ pönï waadete pönö badongä ate tömengä ayongä mönö nö entawëmö bagamöimpa. Ininque Itota Codito adobaï Adocanque iñongante mönö tömengä nempo wæwocadämaï inte quëwëninque awënëidi baï badinque quëwëmompä.

¹⁸ Mänömaï beyæ adocanque adopoque ëñënämaï cæcä beyænque Wængongui mönö tömämö imonte apænte äninque, Mini wænguinque wënæ wënæ cæminipa, angampa. Ayæ adobaï Adocanque adopoque nänö nö cægainö beyænque mönö Wængongui ayongä nö cæmö bamö ininque Wængongui apænte äninque mönö

tömämö imonte, Mini quëwenguinque minitö botö ayömo nö entawëmini bamïnipa, angampa. ¹⁹ Edæ adocanque nänö adopoque ëñënämaï cægai beyænque mönö nanguï imö incæ edæ në wënæ wënæ cämö bagamöimpa. Adobai Adocanque nänö adopoque ëñente cægai beyænque mönö nanguï imö incæ edæ Wængongui ayongä nö cämö bagamöimpa.

²⁰ Mönö waocabo wënæ wënæ cæyömonte Wængongui, Botö wææ änö ëñënämaï inte cämïnipa, ante edonque acämïnimpa, ante wææ angacäimpa. Wææ angä ate edonque adinque mönö waocabo wæætë, Nanguï ëñënämaï inte cæte awädö, ante wæyömonte Adocä incæ godömenque nanguï waadete pönö cæcä æmompä. ²¹ Ininque mönö ëñënämaï cægai beyæ mönö në wæwocamö bagamöimpa. Wæætë mönö Awënë Itota Codito waadete pönö nö cæte badongä ate mönö cöwë wænämaï quëwenguinque Wængongui ayongä nö entawëmö bagamöimpa.

6

Codito nempo quëwëninque mönö në wiwa cædongä nempo wii quëwëmompä

¹ Ininque mönö æbänö anguii. Pancadäniya iimaï anewënanipa. Wængongui godömenque waadete pönö cæcæcäimpa, ante cædinque mönö godömenque wënæ wënæ cæcäimpa, ante tedewënanipa. Mönö iñömö dicæ mänömainö ante tedewenguënëmö imongaa. ² Iñæmpä ædö cæte mänömainö ante tedewenguii. Wënæ wënæ mönö cæte quëwëmämo pædæ godömo æninque Codito teëmë mongæninque wæñongante mönö tömengä tönö godongämæ wænte bai inömo inte ædö cæte godömenque wënæ wënæ cæte quëwenguii. ³ Mönö

Itota Codito nempo quëwengäïmpa, ante æpænë guid-
 inque mönö tömengä tönö godongämæ wængaimö bai
 batamompa, ante mīnitö iñömö ëñënamai imīnitawo.
⁴ Tömengä wænte öñöñongante Mæmpo Wængongui në
 ñäö entawënogä inte täi emönongä inte, Ñäni ömæmoe,
 angä ñäni ömæmongacäïmpa. Inique mönö iñömö
 edæ, Codito tönö ñäni ömæmonte bai mönö miimö
 quëwengäïmpa, ante cædinqe æpænë guidinqe tö-
 mengä wodido godongämæ guiite bai wænte bai öñonta-
 mompa.

⁵ Edæ tömengä wängä ate godongämæ wænte bai
 bagaimö inique mönö tömengä ñäni ömæmongä ate
 tömengä tönö äawocaque bai ewocate ñäni ömæmonte
 bai quëwëmaïmompa. ⁶ Waocä nänö në ö æninäni
 inte tömengä beyænque cæte në quëwënanï bai mönö
 adobai wënæ wënæ mönö cædö beyænque wægamoïmpa.
 Mänömai inte wæyömonte mönö Codito iñömö, Aamö
 cæte gocæminimpa, ante cædinqe wënæ wënæ cæte
 mönö wentamö mongæñö ö ænte teëmë mongægan-
 tapa. Ee mongæñongante tömengä ingante awäa tim-
 podäni wängä adinqe baonque ante mönö wënæ wënæ
 cæpämö iñömö ewente bai ba inique mönö do aamö
 cæte bai mäninö ante emö cæte gomompa. ⁷ Waocä
 æmäwo wængaingä inte edæ ædö cæte wënæ wënæ
 cæqingä. Edæ tömengä nänö wënæ wënæ cægainö ante
 emö cæte aamö cæte bai gogaingä ingampa.

⁸ Mönö Codito tönö äawocaque bai ewocadinque
 adopoque wængaimö inte mönö tömengä tönö
 godongämæ quëwengäïmpa, ante wede pönëmompa.
⁹ Edæ do wænte ñäni ömæmonte miingä quëwënogä
 inte Codito wæætë mempoga wænguingä inämai
 ingampa. Tömengä ñöwo wæwocadämai iñongante
 tömengä ingante, Wæmäwe, ante ædö cæte anguii.

Īñæmpa, wænāmaī incæcäimpa, ante do ēñēmompā.
¹⁰ Tömengä adopoque wæninque mönō wænæ wænæ cægäinō ante æmæwo wido cæcæte ante teēmē mongænte wængacäimpa. Wæætē ñāni ömæmonte miiingä quëwëninque tömengä, Wængonguī beyænque cæte quëwencæboimpa, ante quëwengampa. ¹¹ Minitō adobaī Codito nempo quëwënömini inte wīwa mīni cægäinō ante æmæwo wido cæcæte ante cædinque, Itota Codito tönō adopoque wængäimō imompā, ante wæætē, Mönō Wængonguī beyænque cæte quëwengæimpa, ante pönëninque quëwëedāni.

¹² Mänömaī beyæ mīnitō, Baonga mönō ñömænguīñō quëwëninque mönō wænæ wænæ cæinënō ante mönō ēñente cædāmaī ingæimpa, ante nāmā wææ aadinque edæ wænæ wænæ mīni cæinëwënō ante edæ ēñënāmaī inte quëwëedāni. ¹³ Ayæ mīnitō, Bado, ante edæ, Botō baonca wīwa cæcäimpa, ante edæ mīnitō baö quiomē ī incæ wænæ wænæ cæquinque ante edæ godō cædāmaī iedāni. Wæætē do wæwocagäimīni inte ñāni ömæmonte miiimīni quëwëninque mīnitō wæætē Wængonguī ingante nāmā godöminī æncæcäimpa. Edæ, Botō baö īni edæ tömāo Wængonguī quī impā, ante pædæ godöninque miiimīni quëwëñöminite tömengä wæætē mīnitō tönō godongämæ cædinque nö pönī cæcæcäimpa. ¹⁴ Edæ Möitee wodi nänō wææ angäinō ante ēñëmīni incæte wīi mäninō beyænque quëwëmīnipā. Wæætē Wængonguī waadete pönō cæcä beyænque quëwëmīni inte mīnitō wænæ wænæ mīni cæinëwënō ante ēñente cædāmaī inte quëwencæmīnipā.

Wīwa mönō cæinëwënō ante mönō ēñënāmaī ingæimpa

¹⁵ Möitee wodi nänō wææ angäinō ante ēñente beyænque wīi quëwëmō inte mönō Wængonguī waadete pönō cæcä beyænque quëwëmompā. Nāwangä impā.

Īninqe mōnō æbānō cæquīī. Wādāni īñōmō idiquibæ ante pōnēninqe, Wængonguī pōnō cæcā beyænque nē quēwēnōmō inte mōnō wæætē wēnæ wēnæ cæcæimpa, ante tedewēnānīpa. Mōnō īñōmō ædō cæte mānōmāinō ante cæquīmōō.

¹⁶ Wacā ingante nē cæte quēwēmīni bacæte ante cædinque mīnitō, Bado, bitō botō awēnē badinque edæ āmi ēñente nē cæbo baboe, āmīni īninqe edæ māningā mīnitō imīnite ō ængā ate tōmengā beyænque cæte quēwēmaimīnīpa. Mānīnō ante pōnēmīniyaa. Ayæ adobaī mīnitō wēnæ wēnæ cæinente mīni wædō ante Ao ante cæmīni īninqe mīni wænguinque edæ mānīnō beyænque cæte nē quēwēmīni inte wæbaīmīnīpa. Wæætē Wængonguī ingante, Bado, bitō botō Awēnē inōmi inte edæ āmi ēñente nē cæbo baboe, āninqe mīnitō nō cæte mīni quēwenguinque tōmengā beyænque nē cæmīni babaīmīnīpa. ¹⁷ Mīnitō doyedē mīni wēnæ wēnæ cæinēwēnonque ante cædinque mīnitō awēnē beyænque cæte nē quēwēmīni baī ingamīnīmpa. Nōwo guiquēnē Wængonguī nō nānō ānō ante odōmōmōni ēñēninqe mīnitō iinonque ante edæ nē ēñente cæmīni bamīnitapa. Mānōmaī bamīnīpa, ante adinque botō Wængonguī ingante waa ate pōnēninqe apænebopa. ¹⁸ Ayæ wēnæ wēnæ mīni cædō beyænque cæte nē quēwēmīni inte wæyōmīnite Wængonguī nīmpo cæcā ate mīnitō abæ tawænte ee gote baī quēwēmīnīpa. Nōwo wæætē tōmengā nānō nō cædonque ante ēñente cæmīni īninqe mīnitō edæ nē nō cædongā nempo quēwēninqe tōmengā beyænque cæte nē quēwēmīni bamīnīpa.

¹⁹ Mīnitō ōnōmīnīque inte æiquedō ædæmō ēñenguīmīnīi, ante wædinque botō, Waocā nānō cæi baī impa, ante tededinque odōmōmo aedāni. Wēēnēñedē wēnæ wēnæ cædinque godōmenque quingāmē baī quēwencæte

ante mīnitō, Bado, ante quīomē incæ mīni baonga wīwa cæquinque pædæ godō cæmīnitapa. Mānōmaī beyænque ēñēnāmaī mīni cæinēwēnō ante ēñente cædinque edæ mīnitō mānīnonque ante nē cæte quēwēmīni ingamīn-
impa. Ñōwo guiquēnē tæiyæ waēmō mīni ēwocate quēwenguinque ante mīnitō baō īnī edæ, Wængonguī quī impa, ante tōmāo pædæ godōedāni. Ayæ mīni nō cæquinque ante edæ tōmengā beyænque nē cæmīni inte quēwēedāni. ²⁰ Wēēnēñedē īñōmō mīnitō wēnæ wēnæ mīni cæinēnō beyænque cæte nē quēwēmīni baī inte wægāmīnimpā. Mānīñedē mīnitō nē nō cædongā nempo quēwēnāmaī ingaīmīni inte tōmengā nānō angainō ante edæ ēñēnāmaī ingamīnimpā. ²¹ Mānīñedē quingāmē baī mīni cægāinō ante pōnente wædinque mīnitō ñōwo īñōmō guingo imonte bamīnīpa. Edæ mānīnō mīni wīwa cægāinō beyæ ante dicæ watapæ tote bamīniyaa. Īñæmpa edæ mīni wænguinque mānōmaī cægāmīnimpā.

²² Ñōwo guiquēnē, Wēnæ wēnæ mīni cæinēwēnō ante idæwaa ēñencæmīnimpā, ante cædinque Wængonguī gā pe æmpote ængā ate mīnitō abæ tawænte baī Wængonguī nempo wæætē ee pongāmīnimpā. Īnīnque nē gā pe æmpocā nempo quēwēnīnque mīnitō tōmengā ingante cæte nē quēwēmīni inte mīni cōwē wænāmaī quēwenguinque tæiyæ waēmō ēwocāmīni bamīnīpa. ²³ Mōnō waocabo mōnō wēnæ wēnæ cædō beyæ ante paga cæte baī cædinque Wængonguī mōnō īmonte pōnō pangā wænguēnēmō īmompā. Wæætē, Wantæpiyæ quēwencæmīn-
impa, ante adocā incæ mōnō Awēnē Itota Codito tōnō godongāmæ cædinque mōnō īmonte ōnonque pōnō ængā beyænque mōnō cōwē wænāmaī quēwēmompā.

7

Ēñente cæquēnēmō inte ñā cæyænte baī ingamōimpā

¹ İñänäni eñeedäni. Möitee wodi nänö wææ ante yewæmongainö ante do adimini imini incæte minitö iimäi ante eñeminiyaa. Edæ, Eñente cæedäni, ante tömengä miinäni quëwënanique inänite wææ ante yewæmongacäimpa. İninqe waocä do wäningä iñongante, Cæe, añömö tömengä miingä ingampa diyæ cæquingää. Edæ dobæ wængäimpa.

² İimaïnö ante pönëedäni. Onquiyængä ingante ñänönäni mongä ate tömengä nänöogængä miingä nänö quëwenganca onquiyængä iñömö tömengä nänöogængä ingante eñente quëwencæcäimpa, ante wææ ante yewæmongatimpa. Wæætë edæ tömengä nänöogængä wængä ate onquiyængä owæmpoingä inte adocanque quëwëñongante mänömainö ante edæ ædö cæte wææ anguii.

³ İninqe nänöogængä ayæ miingä quëwëñongante onquiyængä wacä ingante godö guëa mongä adinque, Bitö nänöogængä miingä iñongante bitö wacä ingante guëa godö mömipa töö, ante piinänipa. Incæte tömengä nänöogængä wængä ate abæ tawænte gote bai tömengä adocanque quëwëñongante, Wacä ingante mönämaï incæbiimpa, ante ædö cæte wææ anguinänii. Do owæmpodingä inte wacä ingante mongä adinque tänocä quëwengampa diyæ wææ anguinänii. Edæ owæmpodingä inte tömengä do mongampa.

⁴ Mänömaï beyæ botö töninämini, Mönö adobaï imompa, ante ämo eñeedäni. Ñänönäni nē möningä iñömö eñente cæquënegä ingä bai minitö wëenëhedë adobaï Möitee wodi nänö wææ angainö ante eñente cæquënemini inte ñä cæyænte bai ingaminimpa. Mänömaï inte wæyöminite Codito iñömö, Minitö botö nempo quëwëninque waincate bai cæmini badinque Wængongui beyænque ante eñente cæcæminimpa, ante pönö cægacäimpa. Tömengä baonga ponte eñadinque mönö

beyæ wæninque ñāni ömæmongacäimpa. Īninqe mönö tömengä tönö adobai wænte bai ingaimö inte mönö wëenëñedë mönö ëñenguënengainö ante edæ ædö cæte wæætë ëñenguënëmö inguimöö. Wæætë edæ në ñāni ömæmongaingä nempo quëwënömo inte mönö tömengä quimö inömö imompa.

⁵ Doyedë iñömö mönö në wæwocamö inömö inte baonque ante pönente mönö quëwëñedë Möitee wodi nänö wææ angainö ante ëñente wædinque godömenque wiwa cæinëwente wæmö batamompa. Īninqe mönö baaca incate bai cædinque mönö wænguinque wënæ wënæ cætamompa. ⁶ Wëenëñedë wææ änāni ate mönö, Ædö cæte ëñente cæquii, ante ñā cæyænte bai wægaimö inte mönö edæ Codito tönö adopoque wænte bai ñi cæyænte bai bagamöimpa. Ñöwo guiquënë adopoque wængaimö inte mönö Möitee wodi pedæne ante nänö wææ ante yewæmongainö ante wiï ëñente cæquënëmö inte abæ tawænte bai gomompa. Wæætë edæ Wængongui Tæiyæ Waëmö Önöwoca beyæ quëwëmö inömö inte mönö tömengä miine nänö änonque ante ëñente cæmö imompa.

Wënæ wënæ botö cædö beyæ ante wæbopa, ante

⁷ Īninqe æbänö ante anguimoo. Möitee wodi, Wënæ wënæ cæqui, ante yewæmongacäimpa, ante botö dicæ antawogaa. Ædö cæte edæ mänömaï anguii. Īñæmpa tömengä wææ änāmaï ingä bai botö, Quinö wënæ wënæ cæte i, ante ëñënāmaï incädömoimpa. Botö edæ, Wacä qui äinente wæbo incæte botö äñāmaï inte ee abo inte waa cæbopa, ante pönengaboimpa. Möitee wæætë, “Wacä qui ante äinente wædāmaï ie,” ante wææ angä beyænque botö, Æ äinente botö wædö incæ wënæ wënæ impa, ante tæcæ ëñentabopa. Mäninö ante änāmaï ingä

baï botö, Wënæ wënæ impa, ante ëñënämaï incädö-moimpa. ⁸ Ìnque në wënæ wënæ cädömo inte botö Möitee nänö wææ angainö ante önömoncaque ëñente ate botö quingämë baï tömancoo ante godömenque äïnente wëtabopa. Edæ tömengä wææ änämaï ingä baï mönö wënæ wënæ cädö ïñömö edonque ïnämaï inte edæ dæ ante baï incädönimpa.

⁹ Möitee wodi wææ ante nänö yewæmongainö ante botö adämaï ïmoyedë botö önönque wädämaï quëwengaboimpa. Wæætë, Ìmaï wææ ante yewæmonte ongompä, ante adinque botö, Æ, wënæ wënæ cæbo ïmopa, ante tæcæ ëñëninque, ¹⁰ edæ näñe wænte baï botö, Wæwocabo ïmopa, ante wëtabopa. Edæ, Ìmaï cædinque quëwencæminimpa, ante wææ ante nänö yewæmongainta adinque botö edæ, Botö wænguinque wii ëñente cæbopa, ante tæcæ ëñëninque wëtabopa. ¹¹ Edæ Möitee wodi wææ ante nänö yewæmongainta do adïmo inte mäninö ante ëñënämaï cædinque botö pante wænguinque wënæ wënæ cætabopa. Edæ, Önönque wënæ wënæ cæte tocæï, ante wapiticæ pönente cæyömote tömengä nänö wææ angainö ante odömönäni ëñëmo beyænque botö, Æ, botö wænguinque wënæ wënæ cæbopa, ante wægaboimpa.

¹² Wængongui nänö wææ angainö ïñömö tæiyæ waëmö ïnepa. Ayæ Möitee wodi adobaï mänine tæiyæ waëmö ïnedö ante apænedinque, Ìmaï cædäni, ante wææ än-
inque, Mïni waa cæte quëwænguinque ëñente cæcæmin-
impa, ante nöingä pönï angacäimpa.

¹³ Ìnque tömengä, Mïni waa quëwænguinque impa, ante nänö wææ angainö incæ botö ïmote ædö cæte wænonguii. Wængongui wæætë, Quinö wënæ wënæ cæte ï, ante edonque acæminimpa, ante pönö waa cædinque, Minitö ëñënämaï ïmini beyænque mïni wænguinque

impa, ante wææ angacäimpa. Ìninqe Wængonguï nänö wææ angainö beyænque botö iñömö, Wënæ wënæ cæ-gaboimpa, ante edonque atabopa.

¹⁴ Minitö tæiyæ waëmö ewocacæminimpa, ante Wængonguï mönö önöwoca beyænque ante wææ angacäimpa, ante do ëñëmompä. Incæte botö wiwa cædönö beyænque cæte nê quëwëmo inte botö edæ ömæwocate bai inte wæbopa. ¹⁵ Edæ botö waa cæinente wædö ante cædämaï inte botö wæætë edæ, Wii cæinente awædö, ante botö piïnte adö incæ edæ do cæte wæbopa. Ìninqe botö, Æbänö cæboo, ante ëñënämaï imopa. ¹⁶ Wængonguï nänö wææ angainö ante ëñënämaï cæbo incæte botö ëñënämaï botö cædö ante wii cæinëmopa. Mänömaï botö wii cæinënö beyænque botö, Wængonguï waa cædinque wææ angacäimpa, ante bai cædinque tömengä nänö wææ angainö ante edæ Ao ante bai cæbopa. ¹⁷ Incæte botö wodi wii tömëmo änö ante cæbopa. Wæætë edæ botö wiwa entawënö beyæ wii cæinente botö wædö ante do ëñente cædinque wæbopa. ¹⁸ Edæ ancaa waa cæinente wæbo incæte botö dicæ waa cæbogaa. Mänömaï beyæ botö, Botö baonga quëwëninque botö waa cæquinö iñömö edæ dæ ampa, ante do ëñëmopa. ¹⁹ Waa pönï botö cæinënö incæ cædämaï inte wæbopa. Wæætë edæ wënæ wënæ cæte botö wii cæinente wædö ante ancaa cæte wæbopa. ²⁰ Ìninqe botö wii cæinëmo inte do cæbo ininqe wii tömëmo cæbopa. Wæætë wiwa cæquinque botö entawënö beyænque edæ wënæ wënæ cæte wæbopa.

²¹ Waa cæinente wæbo incæte botö wënæ wënæ cæquinö edæ do entawente wæbopa. Ìninqe botö ñä cæyænte bai imopa, ante do abopa. ²² Edæ botö Wængonguï nänö wææ angainö ante mimönë pönëninque watapæ tobopa. ²³ Incæte, Wængonguï nänö wææ angainö ante botö pönënö incæ ëñënämaï ingæimpa, ante

botö edæ wade wææ ante entawente bai inte wæbopa. Ìninqe nãmä wææ ante bai mimönë botö pönënö tönö wade, Èñënämaï ingæimpa, ante wææ ante botö entawënö tönö näëmæ guädö guëa cæ bai inte wæbopa. Edæ mänine beyæ wiwa botö cæquïnö entawëninque botö yæguincamenca ñã cæyænte bai inte wæwëmopa.

²⁴ Edæ cætawente wængui wæ. Botö wiwa cæquïnö entawente beyæ botö wænguiñö ëñate wæyömote æcänö edæ æna beyænque quëwëmaïmoo, ante wæbopa. ²⁵ Edæ, Itota Codito beyænque quëwenguïmo ïmopa, ante botö Wængongui ingante waa ate pönente apænebopa. Ìninqe Wængongui nänö wææ angaiñö ante ëñëninque botö tömëmö mimönö tömengä beyænque cæte në quëwëmö ïnömo ïmopa. Incæte botö ëñayö beyæ botö wiwa cæinënö beyænque cæte në quëwëmö inte wæbopa.

8

Wængongui Ònöwoca ingante ëwocate quëwengæimpa

¹ Ìninqe mönö Itota Codito nempo quëwëninque mönö wiwa cæinente wæwënö ante cædämaï ïnömö inte wæætë tömengä Ònöwoca pönö angä ëñëninque cæte quëwëmö adinque Wængongui ïñömö, Mini wænguinque, ante apænte änämaï ingampa. ² Edæ wiwa cæinente mönö wæwënö ante mönö wænguinque ëñente cæyömönte Itota Codito ïñömö pönö gä peyæmpote bai ö ængä beyænque mönö abæ tawænte ee gote bai quëwëmompa. Ayæ tömengä Ònöwoca në quëwëngä nänö wææ änö ante wæætë mönö ëñente cæinente quëwëmompa.

³ Edæ Möitee wodi, Ìimaï cæedäni, ante wææ äñongä mönö ïñömö wiwa cæinente mönö wæwënö beyænque aquïi piñænämaï ëñadömö inte, Mönö ædö cæte ëñente cæquïi, ante wægamöimpa. Mönö waocabo mänömaï

wënæ wënæ cædömö inte wæyömö Wængongui wæætë, Waocä bacæcäimpa, ante tömengä Wengä ingante da pönongä pöninque mönö wīwa cæinentai bai adotai bai ëñate pægacäimpa. Ëñate pædinque tömengä nämä baö nänö ëñayö ante edæ, Wængongui qui impa, ante pædæ godonte bai cædinque wënæ wënæ mönö cædö beyænque ante wængacäimpa. Mänömaï cædinque Wængongui mönitö imönite apænedinque, Mini wænguinque mīnitö baonga ëñadinque wënæ wënæ cæmīni awædö, ante apænte angacäimpa. ⁴ Mänömaï pönö cædinque tömengä, Wīwa cæinente mīni wæwënö ante ëñente cædämaï inte mīnitö ñöwo wæætë botö Önöwoca ingante ëwocadinque tömengä beyænque quëwëminipa. Ìninque nö pönī botö wææ angainö ante tömänö ante ëñëninque nö cæte quëwencæminipa, ante cægacäimpa.

⁵ Adopoque ëñadinque baonque në ëñadäni guiquënë wīwa cæinente nāni wæwënö ante pönente cædänipa. Mempoga ëñadinque Wængongui Önöwoca ingante në ëwocadäni guiquënë tömengä nänö änonque ante pönente cædänipa. ⁶ Wīwa cæinente nāni wæwënö ante cæcæte ante në pönëwënäni guiquënë tömënäni nāni wænguinque mäninö ante pönëwënänipa. Wæætë Wængongui Önöwoca angä ëñente në pönënäni guiquënë tömënäni nāni gänë entawente quëwënguinque edæ mänömaï pönënänipa. ⁷ Waodäni wīwa nāni cæinente wæwënö ante cæcæte ante në pönëwënäni iñömö edæ Wængongui ingante pīinte cædänipa. Wængongui nänö wææ änö ante tömënäni önömoncaque ëñënäni inte edæ wīi ëñente cædänipa. Ìñæmpa tömengä Önöwoca ingante ëwocadänipa diyæ ëñente cæquinäni. ⁸ Wīwa cæinente nāni wæwënö ante cæcæte ante në cædäni iñömö, Wængongui waa acæcäimpa, ante anca cædäni incæte Wængongui wæætë edæ waa todämaï incæcäimpa.

⁹ Minitö guiquënë Wængongui Önöwoca ingante ewocamini inique edæ wiwa cæinente mini wæwëninö ante cædämaï inte quëwëmini imaiminipa. Wæætë edæ tömengä Önöwoca angä ëñente cæte quëwëmaïminipa. Incæte waocä æcämenque incæ Codito Önöwoca ingante ewocadämaï ingä inique tömengä wæætë Codito nempo quëwënämaï imaingampa. ¹⁰ Minitö guiquënë Codito ingante entawëmini inique wënæ wënæ mini cægäinö beyænque minitö baö incæ tömengä tönö adopoque wænte baï ëñaminipa. Incæte Codito nänö nö cædönö entawëmini inte minitö önöwoca mempoga ëñate baï miïwoca ewocaminipa. ¹¹ Itota ingante Wæmpocä, Ñäni ömæmöe, angä ëñëninque ñäni ömæmongacäïmpa. Ayæ mini baö ñömæintai ëñayöminite tömengä Önöwoca pö guidinque quëwengä inique Wæmpocä wæætë minitö iminite, Ñäni ömæmöe, ante adobaï angä ñäni ömæmoncæminipa. Edæ tömengä Önöwoca mini në ewocadongä tönö tömengä pönö cæcä ate minitö baö incæ ñömænämaï intai bacäïmpa.

¹² Inique botö töninamini ëñeedäni. Wængongui Önöwoca angä ate mönö ëñente cæquënemö imompa. Wæætë wiwa cæinente mönö wæwënö ante wii ëñente cæte quëwenguënemö inömö imompa. ¹³ Inäempa wiwa cæinente mini wæwënö ante ëñente cæmini inique mini æmæwo wænguinque cæbaiminipa. Wæætë Wængongui Önöwoca ingante ewocadinque minitö wiwa mini cædinö ante wido cæmini inique mini quëwenguinque imaimpa.

¹⁴ Ædänidö inänite Wængongui Önöwoca töö æmænte angä ate ëñente goda inömö tömënäni inömö edæ Wængongui wënäni inänipa. ¹⁵ Minitö guiñente mini wægäinö beyænque ñä cæyænte baï në quëwengaimini inte ñowo wæætë Wængongui Önöwoca ingante æninque wii adobaï guiñente wæmini iminipa. Wæætë Wængongui Önöwoca

pönö cæcä beyænque mīnitö näwä wēmīni bamīnīpa. Ayæ tömengä Önöwoca pönö cæcä ænte ewocadinque mönö guīñenedāmaī inte edæ, Mæmpo, botö Wæmpo, ante apænemompa. ¹⁶Edæ mönö mīmönë ponte apænedinque Wængonguī Önöwoca incæ, Bitö Wængonguī näwä wēmi inömi imīpa, ante apænecampa. ¹⁷Īnīnque mönö Wængonguī wēmö inömö inte tömengä nänö pönonguincoo nē ænguimö imompa. Edæ Codito tönö āanque bai caate wämö ĩnīnque mönö tömengä ñäö bai nänö emö bai ñäö adobai emōnīnque tömengä tönö edæ godongāmæ ænguimö imaimompa.

Ñäö bai mönö entawenguīmāmo

¹⁸ Botö iīmaī ante pönēmopa. Ñöwo caate mönö wæpāmo ĩñömö pönömenque ĩñonte iīncayæ ate ñäö bai mönö emonguīmāmo guiquēnē wīī adobai wædænque inte godömenque nanguī pönī ingæimpa. ¹⁹Æyedēnö Wængonguī wēnāni tæī emonte badīnque edonque a ongonguīnānīi, ante acæte ante edæ Wængonguī nänö badongaincoo incæ nanguī aīnente wædīnque wänö conte bai ongoncoopa. ²⁰Edæ wēnæ wēnæ cædāmaī incoo ĩñonte mönö waocabo mönö ēñēnāmaī cægāinö beyæ Wængonguī nänö badongaincoo önoncooque bai bagatimpa. Wīī nāmā änö beyæ mänömaī bagatimpa. Wæætē Wængonguī nē, ĩīncayæ ate watapæ bacæimpa, ante angaingä inte adocä angä beyænque önoncooque bai bagatimpa. ²¹Edæ Wængonguī nänö badongaincoo ñömænguīncooque inte yæguīncamenca ñä cæyænte bai wæyoncoote Wængonguī gä pe æmpote bai godö cæcä beyænque ñömænāmaī inguincooque bacæcoimpa. Mönö Wængonguī wēñæmö ĩñömönte tömengä pönö ñimpo cæcä ate mönö abæ tawænte bai tæī emonte bamö bai tömengä nänö badongaincoo adobai abæ tawænte bai mīincooque bacæcoimpa. ²²Wēñæ nantate, Æiquedö

ēñaquiringää, ante nāni wæ bai Wængongui nānō badon-gaincoo incæ ñowo ganca godongāmæ nantate bai, Æiquedö waa baquii, ante ö ö wæconcoopa.

²³ Ayæ Wængongui mönō imonte mā pönöningue tö-mengä Önöwoca ingante pönongä ænte do ewocamö inömö inte mönō adobai, Mönō baö miinö ēñaquinque æiquedö Wængongui wēñæmö ædæmö baquii, ante nan-gui æinente wānō conte ö ö wæmompā. ²⁴ Edæ Codito, Botö iincayæ ate badömo ate watapæ bacæimpa, ante pönēedāni, āninqe mönō imonte edæ ængä beyænque quēwēmompā. Ininqe mäninö edæ, Watapæ bacæimpa, ante nānō angainö iñömö iinqe ba acæte ante mönō ayæ wānō cömompā. Mäninö watapæ do ba amö bai mönō, Ayæ ate watapæ ba acæimpa, ante änāmai incædömöimpa. Waocä do æningä inte, Æinente wæbopa, ante quinante anguingää. Iñæmpā edæ dobæ ængantapa. ²⁵ Ininqe mönō æinente wædö ante mönō cöwē ængæimpa, ante wede pönēmö ininqe mönō wæntædā-mai inte ee wānō cömompā.

²⁶ Ayæ adobai mönō aquimö pönī iñömonte Wængongui Önöwoca mönō beyæ cæcampa. Æbänö cæte Wængongui ingante apænequii, ante ēñēnāmai inte wæyömonte tömengä wii waomö tededö ante apæned-inque tömengä önöwēnenque mönō beyæ apænecampa. Mäninö tömengä nānō tededönö ante mönō guiquēnēnō inte önöneca ædö cæte tedequii. ²⁷ Mönō Wængongui quimö tæiyæ wæmö ewocamö iñömonte Wængongui Önöwoca iñömö mönō beyæ apænedinque, Mæmpo Wængongui nānō angainö bai bacæimpa, ante pönēn-inque apænecampa. Ininqe mönō mimöno do adongä inte Mæmpo Wængongui iñömö edæ, Botö Önöwoca æbänö pönēninque apænecää, ante do ēñengampa.

Nē tæi emöningue mönō gänä cæmö imompā, ante

²⁸ Wængongui, Botö änö bai iinque bacäimpa ante cæcæminimpa, ante mönö imonte aa pegacäimpa. In-
inque tömengä nänö änö bai në cæmö inte mönö tömengä
ingante waadete pönemö iñömonte Wængongui wæätë
mönö beyenque cöwë waa pönö cæcä ate mönö edæ,
Inguipoga æbämë ba incæte mönö waa pöni quëwen-
guinque impa, ante edæ do ëñëmompä. ²⁹ Doyedë badön-
inque Wængongui iñömö, Botö Wengä Bamoncadengä
iñongante iñäni tömengä biwüidi badinque nanguü iñäni
yebænte bacædänimpa, angacäimpa. Ininque tömengä
mänömaï cæcæte ante cædinque, Do botö në agäinäni
iñömö tömënänique botö Wengä nänö entawënö bai
adobai entawencædänimpa, ante badongacäimpa. ³⁰ Ayæ,
Botö Wengä nänö entawënö bai entawencæminimpa,
ante nänö në angäinäni iñönänite do aa pegacäimpa. Ayæ
tömengä nänö aa pegäinäni adodäni inänite, Botö ayömo
minitö nö cæmiini bacæminimpa, ante badongacäimpa.
Tömengä ayongä nö cædäni në bagäinäni inänite tö-
mengä, Minitö tæi ëmonte badinque ñäö bai ëmonte
bacæminimpa, ante do badongacäimpa.

³¹ Ininque æbänö ante anguiimoo. Edæ Wængongui
mönö tönö godongämæ cæcä iñongante æcänö mönö
imonte bæ taqingää. Edæ dæ angampa. ³² Tömengä
Wengä adocanque iñongante Wængongui pæ gompodä-
maï inte da pönongä pöninque tömengä wæätë mönö
tömämö beyæ teëmente wæätë wængacäimpa. Mäningä
ingante da pönöninque Wængongui tömengä nänö ëa-
gaincoo ante ædö cæte pönönämaï inguingää. Edæ, Botö
Wengä tönö godongämæ entawencæminimpa, ante Wæn-
gongui tömancoo do pönongä æmompä. ³³ Wængongui
mönö imonte apænte ængä ongöñömonte æcänö, Wiwa
cæbipa töö, ante apænte anguingää. Iñæmpä Wæn-
gongui incæ, Botö ayömo minitö edæ nö cæmiini iminipa,

ante badongä bamöimpa. ³⁴ Itota Codito nē wængaingä inte godömenque ñäni ömæmongaingä inte Wængongui tömëmæ inö do täe contate a ongongampa. Ayæ mönö beyæ Wængongui ingante cöwë apænecampa. Tömengä mänömaï cæcä adinque mönö imonte æcänö, Bitö wænguinque, ante apænte anguingää. Ìñæmpa wii eyepæ inänipa.

³⁵ Codito mönö imonte waadete pönente aayongä æcänö gä pe æmpote ö ænguingää. Edæ, Ædö cæte cæquimöö, ante wæmö incæ caate wæwëmö incæ mönö imonte togænte pänäni wæmö incæ mänömaï wæyömonte mönö Codito dicæ mäniñedë edæ waadedämaï inguingää. Mönö wænguinque gue ænente wæmö incæ weocoo ömaamö inte wæmö incæ tömengä mönö imonte dicæ waadedämaï inguingää. Quiëmë beyæ, Mini wænguinque, ante wææ änäni wæyömonte yaëmenca tacadäni wæyömonte Codito mäniñedë dicæ waadedämaï inguingää. ³⁶ Edæ Wængongui ingante ämotamini ante bai yewæmongatimpa.

“Bitö beyænque wænönäni wængui wæ, ante mönitö tömäa itädë wæmönipa.

Obegaidi inänite, Wænongæimpa, ante änäni bai, mönitö imönite adobai, Wænongæimpa, ante piinäni wæmönipa,”
ante yewæmonte ongö aedäni.

³⁷ Edæ mänimämo mönö wæpämo tömämämo pö ate wædömö incæte mönö imonte nē waadete pönengä nempo ongöningue mönö täi emonte godömenque gänä cæte ongömompa. ³⁸ Botö do ëñente pönëmopa. Mönö nē waadete pönengä nempo ongöñömonte mönö wænguimämo incæ mönö quëwenguimämo incæ anquedoidi incæ wænæidi incæ ñöwopämo incæ iincayæ ponguimämo incæ täi näni piñämämo incæ mänimämo tömämämo ædö cæte mönö imonte gä pe

æmpote ö ænguü. ³⁹ Ayæ edæ æibæ mönö æite wæquimämo incæ guiibæ mönö wæænte wæquimämo incæ quiëmë Wængongui nänö badongaimämo incæ mänimämo tömämämo iñömö mönö Codito nempo ongöñömonte ædö cæte gä pe æmpote ö ænguü. Edæ Wængongui nänö waadete pönënö entawëninque mönö Awënë Itota Codito iñömö mönö imonte waadete pönëninque pæ gompyongante mänimämo tömämämo incæ gä pe æmpote ö ænämaï ingæimpa. Ämo ëñëmaïinipa.

9

Idægoidi inänite Wængongui apænte angacäimpa, ante

¹ Botö iñömö edæ mimö entawëmo inte nämä apænte pönëñömote Wængongui Tæiyæ Waëmö Önöwoca adoyömö ante apæncä ininque botö ædö cæte babæ wapiticæ anguïmo. Edæ Codito nempo quëwënomö inte botö nö pönï apænedinque iïmaï ämopa. ² Mimöno cöwë cæwënente wæwëmo inte botö iïmaï ante pönëninque nanguï wæbopa. ³ Botö guidënäni botö tönö adodäni inönäni iñönänite Wængongui ængä beyænque quëwencädänimpa, ante botö nanguï äninque wæbopa. Ininque Wængongui tömënäni inänite, Quëwencämïnimpa, ante æninque wæætë botö Codito nempo quëwëñömote botö imote piïninque tatodonte wido cæcä bai botö Ao ante piyænë cæcädömoimpa.

⁴ Tömënäni iñömö idægoidi inänipa. Wængongui pæpogacä pædäni ininque tömënanique tömengä wënäni ingadänimpa. Tömënäni inänite Wængongui ñäö entawente nänö tæï ëmönö ante odömongä adinque tömënanique në againäni inänipa. Tömënäni inänite apænedinque Wængongui, Botö pönö cæbo ate mïnitö Ao ämïni ininque mönö godongämë waa cæcæimpa, ante cægacäimpa. Iïmaï cæedäni, ante tömengä

tömənäni inänite täno wææ angä ëñente mäninö nänö wææ angainö ante tömənänique nē mangainäni inänipa. Wængongui oncönē ñænæcönē wadäni guidämaï iñönänite idægoidique guite tömengä ingante waa ate ædæ wæænte apænedänipa. Tömənänique inänite Wængongui, Cöwë waa cæcæboimpa, ante mä apænegacäimpa. ⁵ Mönitö, Mæmæidi, ante möni nē angainäni incæ idægoidi mæmæidi adodäni inänipa. Ìninqe tömənäni Pæingä badinqe mönö Codito inguipoga ëñagacäimpa. Tömengä iñömö tömämö Wængongui inongä ingampa, ante adinqe mönö tömengä ingante apænedinqe, Tömëmi toquinque pönö waa cæbi æmönipa, ante mönö cöwë ñimpo cædämaï apænecäimpa. Mänömaï impa, ante botö, Amëë, ämopa.

⁶ Idægoidi quëwencädänimpa, ante nänö angainö bai Wængongui cædämaï ingacäimpa, ante botö dicæ ämogaa. Wæætë edæ iïmaï impa. Näwä idægoidi näni wede pönönö bai pancadäniya pönenämaï inäni iñönänite botö tömənäni inänite, Näwä idægoidi inänipa, ante apænedämaï iïmopa. ⁷ Edæ Abadäö wodi pæinäni incæ pancadäniya iñömö, Abadäö wodi wënäni, mönö änönäni wii inänipa. Wæætë, “Botö ayömo Itæca wënänique bitö pæinäni inguinäni inänipa,” ante mæmæ Abadäö ingante Wængongui angampa, ante yewæmongatimpa. ⁸ Mänömaï i ininqe Abadäö tapæicä nē ëñate pædäni inänite Wængongui, Abadäö wënäni, ante angantawogaa. Wæætë Abadäö wodi ingante apænedinqe, Bitö wënäni bacädänimpa, ante Wængongui nänö nē angainäni guiquënë tömənänique tömengä wënäni inänipa. ⁹ Edæ, “Ìñedë impa, ante botö änöñedë botö adodö põmo ate mänñedë ate edæ Tada incæ wëñængä onguñængä ingante mancæcäimpa,” äninque Wængongui, Mäninö botö änö bai cöwë cæcæboimpa, angacäimpa.

¹⁰ Wii mäninque impa, ante eñengäimpa. Godömenque iimaï ante mönö pönengäimpa. Wæmpocä adocanque tapæicä ate Adebeka wodi wëna äancadënaque eñagadaimpa. Mänina wæmpocä iñömö mönö wæmæ Itæca wodi ingacäimpa. ¹¹ Tömëna wëna ayæ eñadämaï iñedë ædö cæte wënæ wënæ cæquinaa, ædö cæte waa cæquinaa. Incæte edæ Wængongui, lïngä ingante apænte æncæboimpa, ante nänö angainö ante cöwë bacäimpa, ante cædinque, ¹² tömëna ayæ cædämaï iñönote Wængongui në aa pedongä inte, “Bamoncadengä incæ ayæmengä ingante në cæcä incæcäimpa,” ante Adebeka wodi ingante apænegacäimpa. ¹³ Adobainö ante Wængongui beyæ yewæmongadänimpa. “Aacobo ingante waadete pönengaboimpa. Etawoo ingante guiquënë piïnte agaboimpa,” ante yewæmongatimpa.

¹⁴ Ìninque mönö æbänö anguii. Wængongui dicæ nö cædämaï ingantawogaa. ¹⁵ Wæætë Möitee wodi ingante apænedinque Wængongui iimaï angacäimpa. “Waocä adocanque ingante botö, Wii päinëwædö, äninque tömengä ingante do godö ñimpo cædinque pänämaï incæboimpa. Adocanque ingante në waadete cæinëmo inte botö tömengä ingante do godö waadete waa cæcæboimpa,” angacäimpa, ante yewæmongatimpa. ¹⁶ Ìninque waocä nanguï cæinengä incæte waocä nanguï cæcä incæte Wængongui wii waocä nänö cædö beyænque apænte ængampa. Wæætë nämä nänö waadete waa cæinënö beyænque Wængongui waocä ingante godö apænte ængampa. ¹⁷ Edæ awënë Padaönö wodi ingante apænedinque Wængongui, “Botö iimaï ante cæcæte ante bitö imite ængö cætabopa. Edæ bitö imite ængö cædinque tæi piñænte pönö cæbo adinque waodäni, Wængongui tæi piñængä inte mänömaï cæcampa, ante botö ëmöwo ante ingui-poga tömäo apænedäni do eñencædänimpa, ante

cætabopa.” Wængongui mänömainö ante Padaönö ingante apæñecantapa, ante yewæmongatimpa. ¹⁸ Ìninqe Wængongui, Adocanque ingante godö waadete ñimpo cæcæboimpa, äninque tömengä ingante do godö waadete ñimpo cæcampa. Wæætë wacä ingante guiquënë, Godö cæbo ate mímö ömædengä bacæcäimpa, äninque Wængongui tömengä ingante do cæcä ate edæ mímö ömædengä bate wæcampa.

¹⁹ Mänömainö ante yewæmömo adinque bitö wabänö iimaï anguimi, ante awædö. “Ìñæmpa mönitö Wængongui nänö änö ante Baa änämaï iñömönite tömengä, Minitö beyænque impa, ante quinante piinte angää.” Mänömainö ante ämitawoo. ²⁰ Bitö iñæmpa önömique inömi inte Wængongui ingante wæætedö wæætë ämii. Nê badongä ingante tömengä nänö nê badöinca incæ dicæ, “Botö imote quinante mänömaï badöwëmi,” ante dicæ anguii. ²¹ Nê bædongä iñömö daibo pancaiya æninqe waa pönï wamoncade bædinque ado daibo pancaiya æninqe önonque ewenguincade bæyongante æcänö nê bædingä ingante Baa anguingää. Nê bædongä iñömö nê änongå inte bæcampa. Edæ Baa anguimii.

²² Wængongui nänö nê piinäni iñömö tömënäni nani ömæe ewente wæquinque wiwa cæyönänite tömengä piyänë cædinque wantæpiyæ pänämaï inte ee ongongantawo. Ìñæmpa tömengä nänö piimämo ante adinque do wæcæðänimpa, ante cædinque ayæ tömengä nänö täi piñæmämo ante edonque acæðänimpa, ante cædinque Wængongui mänömaï ee ongongä apa änewëe.

²³ Ayæ wæætë, Botö waadete godö waa cæbo ænäni inte edæ tömënäni iñömö botö ñäö bai botö emönö ante acæðänimpa, ante cædinque Wængongui mänömaï pänämaï inte edæ ee cæcampa. Wæætë, Tömënäni ñäö iñömö quëwencæðänimpa, ante tömengä godö badongä

ate tömönäni ñäö bai ëmönänipa. ²⁴ Edæ möni oodeocabo iñömönite minitö oodeomini inämaï iñöminite Wængongui mönö tömämö imonte mänömaï cæcæte ante aa pegacäimpa. ²⁵ Wængongui iïmaï angampa, ante Ootea wodi yewæmongacäimpa.

“Botö guidënäni inämaï iñönänite botö wæætë,
Botö guidëmini, ante apænecæboimpa.

Onquiyängä botö në waadedämaï ingainga iñongante
botö wæætë,

Botö në waadebi imipa, ancæboimpa.

²⁶ Ayæ, ‘Botö guidëmini inämaï iminipa,’ ante botö on-
gonte äñömö adoyömö ongöninque

botö wæætë edæ, ‘Botö Wængonguïmo në Quëwëmo
wëmini iminipa,’ ancæboimpa.”

Ante adocä Wængongui nänö änö ante yewæmon-
gacäimpa. ²⁷ Idægoidi inänitedö ante yedæ äninque
Itaiya wodi iïmaï apænecäimpa. “Gäwapæ wedeca
ëmönaicoo nanguï pönï öñö bai idægoidi adopodäni nan-
guï pönï inäni incæte pancadäniya guiyä wææntodönï
bai mänimpodänique quëwencädänimpa. ²⁸ Edæ Wæn-
gongui, Inguipoga quëwënäni inänite apænte äninque
botö angainö bai do edæ cæcæboimpa, ante në apæne-
gaingä inte tömengä adocä, Idæwaa, ante quingä pönï
edæ iinque cæcæcäimpa,” ante Itaiya wodi yewæmon-
gacäimpa. ²⁹ Adocä Itaiya wëënë iïmainö ante nänö
apænecäinö bai impa.

“Mönö Awënë në Tæiyæ Awënë tæï piñænongä inte
dodäni inänite, Minitö pæinäni yebænte nanguï
inäni bacädänimpa, ante cædinque pancadäniya
inänite ata cæpocä quëwengadänimpa. Mänömaï
ante cädämaï ingä bai,

mönö wæætë Todömä quëwengainäni bai dæ badinque
Gömoda nänï quëwëñömö dæ ba bai mönö adobai

edæ dæ bacædömöimpa,” ante nänö angainö bai
impa.

Idægoidi adobaï pönëninque quëwenguënëñäni inänipa

³⁰ Ìninque æbänö ante anguii. Oodeo inämaï inäni
guiquënë, Nö entawëmöni bacæmönimpa, ante änämaï
ingadänimpa. Incæte Wængongui godö cæcä beyænque
tömëñäni wede pönëninque wede näni pönëñö beyænque
Wængongui ayongä nö entawënäni do badänipa.

³¹ Idægoidi guiquënë, Nö cæedäni, ante möni wææ
angainö beyænque nö entawëmöni bacæminimpa, ante
në angainäni inte eyepæ cædämaï inänipa. ³² Quinante
eyepæ cædämaï inänii. Tömëñäni wede pönëñämaï
inäni inte wæætë edæ, Mönö nanguï cædinque nö
cæmöni bacæmönimpa, äninque oda cæte näni pönëñö
beyænque dicaboga tee tëwate bai cædinque eyepæ
cædämaï ingadänimpa. ³³ Edæ do Wængongui beyæ
yewæmongatimpa.

“Aquënë quëwënänii. Botö Codito ingante Tiöno näni
quëwëñömö dica bai gö cæbo gongängä adinque
edæ

waodäni dicaboga tee tëwate bai pönëñämaï inäni inte tæ
go wææncædänimpa.

Tömengä adocä ingante në pönengä guiquënë cöwë edæ
guingo imönämaï inte quëwencæcäimpa,”
ante yewæmongatimpa.

10

¹ Botö tönñamini ëñëedäni. Idægoidi quëwencædän-
impa, ante botö mïmönë nanguï aïñente wædinque Wæn-
gongui ingante apäñedinque botö, Bitö æmi beyænque
quëwencædänimpa, ante cöwë apäñebopa. ² Wængongui
beyæ nö cæcæimpa, ante cæinente wädänipa, ante
näwangä impa. Incæte tömëñäni, Wængongui beyæ

nö cæcæte ante æbänö cæquiï, ante ëñenämaï inäni inte önonque cæte wædänipa. Botö, Mänömaï impa, ante në apænebo inömo imopa. ³ Edæ Wængongui pönö badongä ate mönö tömengä ayongä nö entawëmö bamompa, ante ëñenämaï inäni inte idægoidi iñömö, Nämä mönö cædö beyænque nö cæmö bacæimpa, ante cædinque edæ oda cægadänimpa. Mänömaï cædinque tömënäni Wængongui nänö nö cægainö ante edæ Baa angadänimpa. ⁴ Nö cæmö bacæte ante Wængongui nänö wææ angainö ante ëñente cæquënëmö inte mönö tömämö wiï eyepæ inte wægamöimpa. Mänömaï inte wæyömonte Codito iñömö, Mïni pönencabo Wængongui ayongä nö entawëmi bacæminimpa, ante cædinque mäninö Wængongui nänö wææ angainö ante tömänö ante iinque cægacäimpa. Iinque tömengä mänömaï iinque cæcä adinque Wængongui mönö imonte wæætë wææ änämaï ingampa.

⁵ Iïmaï cæedäni, ante botö wææ angainö ëñente cædinque nö cædäni badänipa, ante Möitee wodi iïmaï ante yewæmongacäimpa. “Në ëñente cæcä iñömö tömengä nänö ëñente cædö beyænque quëwencæcäimpa,” ante yewæmongacäimpa. ⁶ Wæætë, Mönö wede pönencabo æbänö cæte Wængongui ayongä nö entawëmö imöö, ante iïmaï ante adocä yewæmongacäimpa. “Bitö, ‘Æcänö öönädë æi äñete wæænguingää,’ ante nämäneque änämaï ie.” Mänömaï ante tömengä, Codito ingante æi äñete wææncæte ante mönö pönënëmaï ingæimpa, ante ancæte ante yewæmongacäimpa. Iñæmpa Codito pönämaï ingampa diyæ æite mäwæmi wæænguingää. Dobæ edæ inguipoga pongacäimpa. ⁷ “Ayæ, ‘Æcänö tadömengadæ wæi äñete ænguingää,’ ante änämaï ie.” Iñæmpa Codito ayæ öñongampa diyæ wæite mämi æænguingää. Edæ Codito dobæ ñäni ömæmonte quëwengampa.

⁸ İninque, Mönö wede pönencabo æbänö nö cæmö bamöö, ante æbänö ante yewæmongacäi. Edæ, Wede pönengæimpa, ante mönitö apænemöni mini ëñënine ante adode ante iïmaï ante yewæmongacäimpa. “Wængonguï nänö nö änöne iñömö edæ bitö weca eyequeï pöni ënepa. Edæ bitö önöne tedeyömi bitö mïmöno pönëñömi tömengä nänö nö änöne edæ adoyömö pöni ënepa.” ⁹ Æbänö cæte quëwenguï, ante iïmaï ante ënepa. Itota Codito Tæiyæ Awënë inongä ingampa, ante bitö önöneca apænedinque, Itota Codito wænte öñöñongante Wængonguï angä ñäni ömæmongacäimpa, ante bitö mïmöno pönëmi adinque tömengä ængä beyænque quëwencæbiimpa, ante adode incæ ënepa. ¹⁰ Mïmöno edæ wede pönëninque mönö Wængonguï ayongä nö entawëmö bamompa. Mänömainö ante wede pönëmopa, ante önöneca apæneyömonte tömengä ængä beyænque mönö quëwëmompa.

¹¹ Codito ingantedö ante apænedinque, “Tömengä ingante në wede pönengä iñömö tömengä edæ guingo imönämaï incæcäimpa,” ante Wængonguï angä ëñente yewæmongadänimpa. ¹² Edæ mönitö oodeomöni iñömönite mïnitö wæætë oodeomïni inämaï iñöminite mönö tömämö imonte adinque mönö Awënë iñömö edæ, Adoyömö pöni iminipa, ante acampa. İninque tömengä adocä tömämö Awënë inongä ingampa. Ayæ tömengä ingante aa pemö ëñëninque tömengä iñömö edæ tömämö imonte nanguï pöni pönö cæcä æmompä.

¹³ İïmaï ante Wængonguï beyæ ante yewæmongatimpa. “Mönö Awënë ëmöwo ante apænedinque aa pedäni ëñëninque mönö Awënë iñömö edæ tömënäni tömänäni inänite ængä beyænque quëwencædänimpa.” ¹⁴ İninque tömengä ingante në pönënämaï inäni iñömö ædö cæte tömengä ingante aa pequïnänii. Ayæ tömengä ëmöwo ante ëñënämaï inäni iñömö tömengä ingante ædö cæte

pönenguinänii. Ayæ tömengä ëmöwo ante wadäni gote apænedämaï iñönäni tömënäni ædö cæte ëñenguinänii. ¹⁵ Ayæ edæ wadäni da godönämaï iñönäni në apænequënänäni wæætë ædö cæte gote apænequïnänii. İmaïnö ante edæ Wængonguï beyæ ante yewæmongatimpa. “Tömengä waa pönï nänö cægäinö ante në watapæ apænedäni iñömö tömënäni nänäni apæneceæ gote cægönïwa iñömö edæ waa pönï ëwadänipa,” ante nänäni yewæmonte angäinö baï impa. Edæ në apæneceæ godäni inänite Wængonguï waa acampa.

¹⁶ Mönö Awënë ingantedö ante watapæ apænedäni ëñëninque idægoidi pancadäniya Ao angadänimpa. Pancadäniya guiquënë Baa angadänimpa. Tömënäni mänömainö nänäni cædinö ante Itaiya wodi iïmaï ante yewæmongacäimpa. “Awënë Wængonguï ëñëmi. Mönitö apænemöni tömënäni nänäni ëñënö ante edæ æcänö ëñente pönengä. İñæmpa në pönengä iñömö edæ dæ angä awædö,” ante yewæmongacäimpa. ¹⁷ İninque gode änänäni ate në ëñënanique wede pönënäni badänipa. Ayæ Codito nänö änönö ante gode ante apænedäni beyænque në ëñënanäni badänipa. ¹⁸ İninque botö, Mäninö ante idægoidi gobæ ongönänipa diyæ ëñënämaï inguinänii, ämopa. Do ëñënanitapa, ante edæ iïmaï ante Wængonguï beyæ yewæmongatimpa.

“Në apænedäni inguipoga tömäo gote tededäni ëñënanäni.

Woadäni inguipoga nänäni quëwenganca quëwëñönänite mäninö tömënäni nänäni apænedö ante do ëñënanäni,” ante yewæmongatimpa.

¹⁹ Ayæ wæætë, Idægoidi önömonca ëñëninque ömæcadäni inänipa diyæ ëñënämaï inguinänii. Do ëñënanitapa. Edæ Möitee wodi incæ iïmaï ante yewæmongacäimpa.

“Wadäni önönänique iñönänite botö godö waa cæbo ad-
inque

mïni idægocabo wæætë, Mönitö imönite wïi pönö cæbii,
ante piïnte wæcæminimpa.

Ayæ wadäni ocäi ömæcadäni iñönänite

botö godö waa cæbo adinque mïnitö wæætë nê piïnte
amïni bacæminimpa,”

Ante cæcæte ante Wængonguï pönö cægacäimpa. ²⁰Itaiya
wodi guiquënë Wængonguï beyæ ante guïñänämaï inte
apænegacäimpa.

“Wadäni iñömö botö imote ante diqui diqui mïnämaï
inäni incæte do adänitapa.

Ayæ, Wængonguï ingante ainëmönipa, ante änämaï
iñönänite, Botö imote aedäni, ante botö odömömo
adänitapa.”

²¹Äninue Itaiya wodi idægoidi inänitedö ante apæned-
inque, “Ëñänämaï inte Baa änönäni iñönänite botö,
Pöedäni, ante tömäa itæde önompo compo compo cæbo
incæte pönämaï inänitapa.”

11

Idægoidi pancadäniya inänite Wængonguï apænte ængä

¹ Ìninque botö iïmaï ante apænebopa. Tömengä
quïnäni iñönänite Wængonguï dicæ idægoidi inänite
Baa angantawogaa. Ìñæmpa botö adobo näwä idæ-
gobo imopa. Abadäö wodi pæïmo inömo inte botö edæ
Beencaminö wodi pæïmo inömo inte tömengä pæinäni
tönö adocabobo tömëmo inömo imopa. ² Idægoidi botö
quïnäni incädänimpa, äninque Wængonguï wëenëñedë
pönï mönitö imönite adinque do apænte ængacäimpa.
Ìninque mönitö tömengä nänö nê agaïmöni iñömönite
tömengä cöwë Baa änämaï ingacäimpa. Idægoidi inänite

püinte äninque Ediya wodi Wængonguü ingante apænegacäimpa, ante æbänö yewæmonte ongompa, ante minitö adämaï iminitawo.

³ “Awënë ëñëmi. Bitö beyæ nê apænedäni inänite wænöninque idægoidi godömenque cædinque, Wængonguü quï, ante nâni iya tainca bæ tadinque edæ wido cædänitapa. Ayæ botö adoboque inte edæ ayæ quëwëñö-mote botö imote wænoncæte ante cædäni wæbo abi.”

⁴ Äñongante Wængonguü, “Ïñæmpa botö tiæte müido ganca mänimpodäni inänite, Botö quïnäni inänipa, ante wææ gompobo quëwënäni apa quëwëe. Wadäni nâni, Mönitö wængonguü Baado ingampa, nâni äñongä weca botö quïnäni ïñömö edæ da guicapodämaï inänipa cæbii,” angacäimpa, ante nâni yewæmongainta adämaï iminitawoo.

⁵ Nöwo ïñömö edæ adobaï impa. Idægomöni möni cabo incæ mëa pönï imöni inte Wængonguü ingante Baa äñämaï ïñömönite tömengä mönitö imönite waadete pönö cædinque, Botö quïmïni imïnipa, ante apænte ængampa.

⁶ Ïninque, Wængonguü waadete pönö cædinque apænte ængampa, ante adinque tömëmonque waa cæmö beyæ ædö cæte Wængonguü apænte ænguingää. Ïñæmpa tömëmonque waa cæmö beyæ Wængonguü mönö imonte apænte ængä bai, Wængonguü waadete pönö cæcampa, ante ædö cæte anguënë i. Wæætë edæ tömëmonque waa cæmö beyæ Wængonguü apænte ængä bai tömengä adocä ædö cæte nänö waadete pönö cædö beyænque mönö imonte apænte ænguëngää. Ïñæmpa Wængonguü waadete pönö cædinque apænte ængä ïninque, Tömëmonque waa cæmompä, ante ædö cæte anguüi.

⁷ Mänömaï i ïninque æbänö ante anguüi. Edæ idægoidi tömënäni nâni nanguü æïnënö ante diqui diqui minte æñämaï ïñönäni mönö ïñömö Wængonguü nänö nê apænte ængaimö imö ïñömö edæ do æntamompä. Nê

ænämaï inäni inänite Wængongui ee ayongante mimö ömædänäni bagadänimpa. ⁸ Iïmaï ante Wængongui beyæ nani yewæmongainö bai ingatimpa. “Tömänäni inänite Wængongui godö cæcä ate möwo möinente bai wädäni inte tömänäni awinca emönäni incæ ñowo ganca adämaï inte wädänipa. Önömonca emoncadäni incæ edæ eñänämaï inte wädänipa,” ante yewæmongatimpa. ⁹ Ayæ awënë odeye Dabii wodi Wængongui ingante apænedinque iïmaïnö ante apænegacäimpa.

“Wængongui eñëmi. Waodäni nani wænguinque gote ææmæ bedäni bai cædinque iïnäni iñömö edæ wapiticæ nani towënönö ante gote towänänipa. Incæte bitö godö cæbi ate tömänäni nani towënö beyæ edæ wæncädänimpa, ämopa.

Tömänäni tee tēwate bai oda cæte wæyönäni bitö godö pämi wæcädänimpa, ämopa.

¹⁰ Bitö godö cæbi ate tömänäni awinca edæ mäë mämönte bai bamöninque adämaï incädänimpa.

Ayæ teëmë mongæninque bocæ ñongænte cöwë wæcädänimpa, ämopa,”

ante awënë Dabii wodi Wængongui ingante apænegacäimpa.

Idægoidi inämaï inäni quëwänänipa, ante

¹¹ Ñowo wæætë iïmaï ämopa. Do oda cädäni incæ idægoidi iñömö dicæ æmæwo tæ go wæænguinäni inänitawogaa. Iñæmpa ayæ ate ængæ gantidinke tömänäni në quëwënguinäni inänipa. Incæte Wængongui, Tömänäni eñänämaï cädäni beyæ wädäni quëwänäni adinke idægoidi wæætë, Mönö quëwengade impa, ante piïnte wæcädänimpa, ante godö cæcä ate idægoidi edæ oda cægadänimpa. ¹² Ininke idægoidi eñänämaï cædinque ænämaï inäni beyæ mönö inguipoga tömämæ mönö quëwencabo wæætë edæ nanguï pönï æmompä. Tömänäni

ænāmaï inte ömæpodāni wædāni beyænque mīnitō idægomīni ināmaï imīni wæætē nanguï pōnī æmīnīpa. Inque idægoidi nāni quēwenguīmāmo iincayæ ate eyepæ pōnī ænāni ate edæ æbānō baquīi. Edæ idægoidi iincayæ ate eyepæ pōnī ænte entawēnāni beyænque mōnō waocabo tōmāmō godōmenque nanguï pōnī ænte entawengæimpa.

¹³ Idægomīni ināmaï imīni imīnite apænebo ēñēedāni. Botō imote Codito, Idægoidi ināmaï ināni inānite apænecæbiimpa, ante da godongā gotabopa. Inque botō, Mīnitō imīnite nē apænebo inte tobopa, ante nanguï tedebo. ¹⁴ Edæ, Idægoidi ināmaï ināni incæ do quēwēnānīpa, ante botō tedebo ēñente wædinque botō guidēnāni idægoidi wæætē, Mōnitō adobaï quēwencæmōnīpa, ante pūinte wæcædānīpa, ante tedebo. Ayæ adodāni pancadāniya godōmenque pōnēnīnque quēwencædānīpa, ante cædinque botō edæ nanguï tedebo.

¹⁵ Idægoidi inānite Baa ante wido cædinque Wængonguï wæætē inguipoga tōmāmæ quēwēmō iñōmonte piyænē cædinque edæ waadete pōnō cægacāimpa. Inque tōmengā iincayæ ate idægoidi inānite Ao ante ængā ate edæ æbānō baquīi. Māniñedē ate edæ mōnō wænte oñonte baï inōmō inte edæ mōnō nāni ömæmonte quēwengæimpa. ¹⁶ İmaï ante pōnengæimpa. Pāo pancaboga pancæte baï wædænque ināni inte tāno nāni pōnente quēwencabo iñōmō tæiyæ waēmō ināni inque iincayæ nāni pōnente quēwencabo guiquēnē pāo babo baï adobaï ināni inte tōmēnāni adobaï tæiyæ waēmō inānīpa, ante pōnengæimpa. Tāno pōnengaināni guiquēnē tæcæguinto baï inōnāni inte tæiyæ waēmō ināni inque edæ iincayæ pōnēnāni guiquēnē yæpænto baï inōnāni inte adobaï tæiyæ waēmō inānīpa.

¹⁷ Odibowæ önonque pæwæ incæ wainca incacæiropa, ante cædinque waocä tömengä nänö mingaiwæ waa pöni incawæ adinque yæpængö nämænte godö önonque pæwæ yæpæntoga mine timongä aminipa. Idægoidi iñömö waocä nänö minte pæwæ bai iñönänite Wængongui pancadäniya inänite yæpængö wæi ñämænte bai wido cæcä wædänipa. Tömänäni mänömaï wæyönäni bitö guiquënë önonque pæwæ yæpængö bai imitapa. Incæte Wængongui, Odibowæ yæpængoncoo bai tæcæguinto beyænque odæ yate bai pæte incacæiropa, ante odibowäa yæpæntoga godö mini tinte bai cædinque bitö imite waadete pönö cæcä ate bitö idægoidi beyænque miimi inte ongömipa. ¹⁸ Mänömaï i ininque bitö wæætë edæ, Wængongui botö imote pönö cæcæte ante tömänäni inänite wido cæcampa, ante bitö nämä ængö cæcæte ante cædinque idægoidi inänite ante wiï piinte ancæbiropa. Iñæmpa tæcæguinto ëwa bai inäni inte idægoidi iñömö edæ bitö beyæ dicæ quëwänäniyaa. Wæætë edæ tæcæguinto ëwa bai inäni beyænque bitö quëwëmipa, ante apænebo ëñëninque bitö piimi ininque, Mänömaï impa, ante täno pönëe.

¹⁹ Ininque bitö, “Odæ yacæiropa, ante cædinque godö mine timönäni bai Wængongui botö imote pönö cæcæte ante cædinque idægoidi inänite wæætë wido cæcampa,” ante pönëmitawoo. ²⁰ Bitö pönönö edæ näwangä impa. Incæte edæ tömänäni nani pönänämaï inö beyænque Wængongui tömänäni inänite wido cægacæiropa. Bitö guiquënë wede bitö pönönö beyænque miimi inte ongömipa. Ininque bitö guinente wædinque edæ nämä ængö cædämaï inte edæ, Botö waëmö imo beyæ cæcantapa, ante pönänämaï imäwe. ²¹ Iñæmpa näwä yæpængö bai inäni inänite Wængongui tapodämaï inongä inte bitö önömique iñömite dicæ ata cæpo-

quingää.

²² İninque, Wængongui nē waadete cædongä incæ cōwē nē apænte pangä ingampa, ante pönēe. Tömengä iñömö nē oda cædäni inänite pangampa. Wæætē bitō nē waadete cædongä nempo quëwēmi ininque tömengä bitō imite waadete cæbaingampa. Incæte tömengä nempo wii quëwēmi ininque tömengä wæætē bitō imite edæ wæi ñæmænte bai wido cæbaingampa. ²³ Idægoidi guiquënë, Idæwaa pönënamai inte awædö, ante ocæ emænte pönäni adinque Wængongui nē täi piñænongä inte tömënanä inänite wæætē ado awæ yæpæntoga godö mini timonte bai pönö cæcä ate miinäni edæ ongömainäni. ²⁴ Waodäni waa incawæ yæpængö nämænte önonque pæwæ yæpæntoga godö nani mine timönö bai Wængongui wii adobai cæcampa. Wæætē edæ bitō önonque pædiwæ yæpængö bai iñömite tömengä waadete pönö nämænte bai cædinque, Näwä idægobi babipa, ante waa pæwæ yæpæntoga godö mini timonte bai cæcampa. Bitō imite mänömai waa cæcä inongä inte tömengä idægoidi inänite æbänö godömenque waa cæbaingää. Tömënanä iñömö waa pönä pæwæ yæpængoncoo tömengä nänö wæi ñæmæncoo bai inte wæyönänite adowænē yæpæntoga godö mine timonte bai cædinque tömengä tömënanä inänite, Näwä idægomini inte minitö wæætē miimini ongoncæminimpa, ante do cæcæcäimpa.

Idægoidi iinque bayonte quëwencædänimpa, ante

²⁵ İñänäni ëñeedäni. Minitö nämä ængö cædämai incæminimpa, ante cædinque botö wëenëñedē mini ëñënamai ingainö ante edæ wææ ämopa. Minitö idægomini inämai imini mini pönencabo eyepæ pönä mini yebænganca idægoidi iñömö ñöwo mimö ömædënanä inte wædönäni inte edæ mäninganca cōwē mimö ömædënanä

inte wæcædänimpa. ²⁶ Ìncayæ ate quiquënë idægoidi tōmānāni quēwenguināni ìnānīpa. Edæ ìīmaī ante yewæmonte ongompa.

“Mōnō ñā cæyænte baī tee mōnete baī wæwēñōmonte nē Ñimpo Cæcā ìñōmō Tiōno ìñōmō quēwente poncæcāimpa.

Aacobo wodi pæīnāni Wængonguī ingante ēñēnāmaī cæte quēwēnāni adinque nē Ñimpo Cæcā ìñōmō tōmēnāni nāni ēñēnāmaī entawēnō wadæ cæcā ate tōmēnāni wæætē ēñente cæte quēwencædänimpa.

²⁷ Ìnīnque wēnæ wēnæ nāni cægāinō ante wadæ cæte wido cædinque Wængonguī tōmēnāni ìnānite ìīmaī angampa.

Botō pōnō cæbo ate mīnitō Ao āmīni ìnīnque edæ mōnō godongāmæ waa cæte quēwengæīmpa, ante Wængonguī angampa,” ante yewæmongadänimpa.

²⁸ Codito ingantedō ante watapæ ēñente pōnēnīnque mīnitō idægomīni ìnāmaī ìmīni do quēwēmīni beyæ idægoidi wæætē Wængonguī ingante pīinte adānīpa. Incæte tōmēnāni mæmæīdi ìnānite nē apænte ængaingā inte Wængonguī wæætē mæmæīdi beyænque ante pōnēnīnque ñōwodāni ìnānite waadete pōnengampa. ²⁹ Edæ waomō ìmonte quīncoomē pōnongā æñōmonte Wængonguī adodō ò ænāmaī ingampa. Ayæ adobaī waomō ìmonte aa pedīnque tōmengā wadō ante ānāmaī inte edæ adodō ante edæ cōwē aa pecampa. ³⁰ Mīnitō wēēnēñedē ēñēnāmaī cæmīni incæte Wængonguī ìñōmō idægoidi ēñēnāmaī cædāni beyæ mīnitō ìmīnite wæætē waadete cædinque pōnō ata cæpocā quēwēmīnīpa. ³¹ Ayæ adobaī mīnitō ìmīnite pōnō waadete ata cæpocā quēwēmīni beyæ idægoidi ēñēnāmaī cædāni ìñōnānite Wængonguī ñōwo tōmēnāni ìnānite adobaī waadete cædinque godō ata cæpocā quēwēnānīmpa. ³² Ìnīnque tōmengā, Mīni

waocabo tömämini iminite botö waadete cædinque pönö ata cæpocæboimpa, ante cædinque, Mini ëñënamai cæcabo inömini inte minitö nämä ëö toyænte aamö cædämai incæminimpa, ante tömämö imonte ñä cæyænte bai cæcä wæcongämöimpa.

³³ Ìninqe Wængonguï nanguï pönï waadete entawëngä iñongante tömengä nänö pönö cædönö ante mönö ædö cæte tee mante aquï. Tömengä tömancoo do adongä inte nanguï pönï ëñëngä inte cæcä ingänö angüënë. Tömengä edæ, Æbänö ï, ante do againgä inte edæ, Æbänö cæquï, ante do apænte añongante mönö waocabo wæætë tömengä nänö cædö ante ædö cæte ëñengüï. Tömengä ædönö ponte ædönö gocää, ante pönente wædinque mönö tömengä önöwa amompa diyæ taadö aquï. ³⁴ Edæ iïmai ante nani yewæmongainö bai impa. “Mönö Awënë æbänö pönengää, ante pönente wædinque æcänö ëñengää. Ayæ, iïmai cæquï impa, ante mönö tömengä ingante edæ ædö cæte odömonte apænequï. ³⁵ Wængonguï ingante æcänö do godongä inte wæætë, Bitö debe imipa, ante anguingää. Ìñæmpa tömengä ingante godömompa diyæ debe inguingää,” ante Itaiya wodi nänö yewæmongainö bai impa. ³⁶ Edæ tömengä nänö pönongaincooque inte edæ tömancoo ongompa. Mönö waocabo inömö tömengä badongä beyænque tömengä quïmö baquinque ongömompa. Ayæ adobai edæ tömengä badongä beyænque tömancoo tömengä quincocooque edæ baquinque ongoncoopa. Edæ tömengä adocanque pönï ñäö entawente edæ cöwë täi emoncæcäimpa. Mänömai impa, ante mönö, Amëë, ante apænecæimpa.

12

Wængonguï quïmö imompa, ante cæte quëwengäimpa

¹ Botö tönĩñamini ēñēedāni. Wængonguĩ waadete pönö waa cæcä ængaimini inte minitö iimāi cæedāni, ante botö nanguĩ ämopa. Wængonguĩ quĩ, ante baö pædæ godönāni waa ængä baĩ minitö adobaĩ edæ, Wængonguĩ quĩmōni imōnipa, ante miimini inte edæ tömengä ingante nämä pædæ godōmini ængæedāni. Mänōmaĩ cædinque minitö tömengä önöwa inö mini ædæ wæænte nanguĩ cæquēnēnō ante edæ do cæmini incæminimpa. Mänōmaĩ godōmini æninqe tömengä wæætē edæ, Botö ayōmo tæiyæ waēmō pönōmini æmopa, ante tocæcäimpa. ² Inguipogaque ante pönente mini cægäinö ante ñöwo ñimpo cædinque minitö miimini mini quēwenguinqe ante edæ ocai miinqe encate baĩ nöngä ante pönēedāni. Mänōmaĩ cædinque minitö, Wængonguĩ waa pönĩ nänö änönö ante, Æbänö i, ante ædæmō ēñēninqe, Tömengä nänö änö inōmō eyepæ pönĩ impa, ante ēñencæminimpa. Mäninö ante ēñente cæte quēwēmō inte mönō tömengä tönö godongämæ waa tocæimpa.

³ Wængonguĩ waadete pönö cæcä ate botö nē apænebo badimo inte iimāi ante apænebopa. Minitö nämä pönēninqe, Ñænæmo imopa, ante pönēnāmaĩ iedāni. Wængonguĩ pönö badongä ate minitö wede pönēmīni badimīni inte mini wede pönenganca mäningancaque pönēninqe iimāinö ante pönēedāni. Botö önōmoque baĩ inōmo imopa, ante ocai encamini inte tōö pönĩ pönēedāni. ⁴ Mönö baö adoyonque pönĩ ēñamō incæte wiĩ adodonque mönö cæquēnēnō ante ēñamompa. Ininqe mönö aquinö ante awinca emōninqe mönö dao dao goquinö ante önöwa ewamompa. Ayæ wadö mönö cæquinö ante wayö ēñadinque mönö wæætē wadö mönö cæquinö ante wayö ēñadinque wayö wayö mönö ēñacoo ēñamompa. ⁵ Ininqe wayö wayö ēñamō incæ mönö baö pæ pagænguincoo adoyonque i baĩ mönö adobaĩ Codito nempo

mönö quëwencabo nangui pönï imö incæte adocabomö inömö imompa.

⁶ Ìninqe mönö adocabomö iñömonte Wængongui waadete pönö cædinque mönö imonte wadö wadö mönö cæquinö ante tömänö pönongä æmompä. Ìninqe mönö tömengä da pönongä mönö ænganca edæ adoganca wadö wadö cæmompä. Mänömaï ænte cædömö iñömonte pancaminiya iminite Wængongui pönö apænecä ëñëninque minitö tömengä beyæ në apænemini do badinque wede mini pönenganca apænecäni. ⁷ Wæætë wamini iminite Wængongui pönö cæcä æninque minitö wadäni inänite në cæmini do badinque wadäni beyæ cæcæminimpa. Wæætë wamini iminite tömengä pönö cædinque odömonte apænecä ëñëninque minitö në odömonte apænemini do badinque odömonte apænecæminimpa. ⁸ Ayæ wæætë wamini iminite Wængongui pönö waadete apænecä ëñëninque në waadete apænemini badinque minitö iñömö wæntæye inte wädäni inänite ædæmö apænemini ëñëninque tömënanï wæætë edæ wampo pönëninque täi piñænte cæcædänimpa. Wamini iminite Wængongui pönongä æninque në nënempomini badinque minitö, Tömëmöni qui, ante wädämaï inte wæætë wadäni nani ænguënënö ante eyepæ godömini æncædänimpa. Wamini iminite Wængongui pönö angä ëñëninque minitö wæætë awënëidi bai në ämini badinque wadäni inänite nöingä cæte awënëidi bai ancæminimpa. Wamini iminite Wængongui ædæmö waadete pönö waa cæcä æninque minitö wæætë ædæmö waadete cæmini do badinque wadäni inänite ædæmö waadete godö waa cædinque edæ wädämaï inte tocæminimpa.

Codito nempo quëwëninque iïmaï cæcæimpa, ante

⁹ Botö waadete pönëmopa, ante tedemini ininque minitö nöinö cæte waadete pönencæminimpa. Wíwa

mīni cædönö ante pīininque wido cæedāni. Wæætē, Quinö waa cæquīi, ante adinque māninö ante ænte mīnitö mīmönē ædæmō entawēninque cōwē waa cæte quēwēedāni. ¹⁰ Mönö waadete pönencabo imompa, ante pönēninque wacā ingā wacā ingā waadete pönente cæedāni. Wadāni ñænænāni inānīpa, ante mīnitö tōmēnāni inānite ængö cæte bai cædinque wæætē, Botö wædāmo imopa, ante nāmā ængö cædāmaī iedāni.

¹¹ Tæï pīnænte ewocadinque mönö Awēnē beyæ ante wæntædāmaī inte cæedāni.

¹² Watapæ bacæimpa, ante pönēninque tocæmīnīmpa. Caate wæwēmīni incæte wæntæye badāmaī inte ee cæedāni. Ñimpo cædāmaī inte Wængonguī ingante cōwē apæneedāni.

¹³ Wængonguī quīnāni ænguēnēnāni inte wædāni adinque mīnitö māincoo wæætē nēnempomīni æncædānīmpa. Ayæ, Botö oncönē pö guite cænte mōedāni, ante wadāni inānite waadete cæedāni.

¹⁴ Mīnitö imīnite nē pīinte cædāni iñönānite mīnitö tōmēnāni inānite waadete godö apæneedāni. Edæ tōmēnāni inānite waadete apænedinque, Wængonguī mīnitö imīnite waa cæcæcāimpa, ante apænedinque wæætē pīinte änāmaī iedāni.

¹⁵ Nē watapæ todāni tönö godongāmæ watapæ toedāni. Nē Ca wædāni tönö mīnitö godongāmæ Ca ca wæedāni.

¹⁶ Mönö pönencabo imompa, ante adoyömö pönente quēwēedāni. Önönānique nāni nē änönāni tönö godongāmæ cædinque, Botö ñænæmo imopa, ante pönēnāmaī iedāni. Mīnitö, Wadāni pönömenque ocai encayönāni botö godömenque nanguī pönī encabo imopa, ante nāmā ante pönēnāmaī iedāni.

¹⁷ Wadāni mīnitö imīnite pönö wēnæ wēnæ cædāni adinque mīnitö wæætē godö wēnæ wēnæ cædāmaī

iedäni. Ayä, Quinö waa cæquiï, ante tömänäni nani waa adönö ante adinque mīnitō mäninonque ante cædäni. ¹⁸ Eyepæ imīni inte mīnitō cæganca cædinque tömänäni tönö godongämæ piyænë cæte quëwëedäni. ¹⁹ Botö në waademīni ëñëedäni. Mönö Awënë beyä iïmaï ante yewæmongatimpa. “Wënæ wënæ cædäni adinque botö wënæ wënæ nani cædinö beyä ante në apænte panguënëmo inte tömëmo eyepæ wæætë godö cæbo wæcædänimpa, ante Awënë angampa,” ante yewæmonte ongompæ cæminii. Mīnitō imīnite pönö wënæ wënæ cædäni wæmīni inique edæ wæætë godö cædämaï ee aedäni. Edæ në äingä bate pänongä inte Wængonguï incæ pancæcäimpa. ²⁰ Wæætë, “Bitö imite në piïnte cædongä incæ gæwænte wæcä adinque godömi cængæe. Gue ænente wæcä adinque godömi becæe. Edæ mänömaï waa cædinque edæ tömengä guingo imonte nänö wæwenguinque bitö tömengä ingante waa cæcæbiimpa,” ante Wængonguï beyä yewæmonte ongö apa cæbii. ²¹ Tömënäni wënæ wënæ nani cædö beyä oda cædämaï inte wæætë mäninö ante wido cæte bai cædinque bitö waa cædinque edæ tæï ëmonte gänä cæe.

13

¹ Gobiedöno awënë nempo waodäni ëñente cæte quëwencædänimpa, ante Wængonguï incæ godö gö cæcä beyænque gobiedöno awënëidi badänipa. Edæ Wængonguï mänömaï ante gö cædämaï ingä bai quingänö awënë inguënengä. Edæ dæ ancædönimpa. Inique gobiedöno awënëidi inänite mönö tömämö Ao äinique ëñente cæcæimpa. ² Inique awënë ingante æcänö Baa änaa tömengä nänö apænte pante wæquinque Wængonguï nänö goncægäinö ante ëñenämaï inte edæ Baa angampa. ³ Në waa cædäni guiquënë awënëidi

inänite waa ate todinque guiññenāmaī inānīpa. Wæætē wēnā wēnā cædāni guiquēnē awēnēidi inänite guiññente wædānīpa. Gobiedōno awēnē ingante guiññenāmaī inte quēwencæboimpa, ante bitō ämitawoo. Īnīnque bitō guiññenāmaī inte quēwencæte ante waa cæcæbiimpa. Waa cæbi adinque tōmengā, Bitō waa cæbi abopa, ante pōnō waa cæcā inīnque bitō guiññenāmaī imaimīpa.

⁴ Botō imote nē cædongā inte mīnitō beyæ waa cæcæcāimpa, ante Wængonguī gobiedōno awēnē ingante godō gō cæcā ongongampa. Edæ Wængonguī ingante nē cæcā inongā inte tōmengā nē wēnā wēnā cæcā ingante nō cæte nē panguēnengā ingampa. Īnīnque awēnē yaēmē nē næængā inte wīī ōnonque næængampa cæbīī. Wēnā wēnā cæbi inīnque edæ guiññente wæcæbiimpa. ⁵ Īnīnque mōnō, Pangā wæcæ wæ, ānīnque awēnē ingante ēñente cæcæimpa. Ayæ pangā wæmō incæ wīī pangā wæmō incæ mōnō mīmō nē entawente nāmā apænte ānōmō inte mōnō awēnē ingante Ao ante ēñente edæ nōingā cæcæimpa. ⁶ Wængonguī beyæ nē cædōnāni inte awēnēidi iñōmō tōmēnāni nempo quēwēnāni inänite cōwē aadinque mānīnque cæte quēwēnānīpa. Mānōmaī ī inīnque mīnitō, Awēnēidi eyepæ ænīnque mōnitō beyæ cæcædānīpa, ante tōmēnāni nāni äinta pædæ godōmīni ænānīpa.

⁷ Æcāmenque ingante cæquēnēmīni imīni inte mīnitō tōmānāni inänite mīni cæquēnenganca do godō cæmīni æncædānīpa. Awēnē nempo quēwēñōmonte tōmengā eyepæ ænīnque mōnō beyæ cæcæcāimpa, ante mīnitō awēnē nānō äinta godonguēnēmīni inte do godōmīni ængædāni. Waocā ingante mīnitō guiññente ēñen-guēnēmīni imīni inīnque tōmengā ingante guiññente ēñeedāni. Waocā ingante mīnitō waa aquēnēmīni imīni inīnque edæ tōmengā ingante waa aedāni.

⁸ Wacä ingante mini cæquënënö ante edæ ee ongönämaï inte godö cæmini ængä ate abæ tawænte gocæbi-
 impa. Wæætë wacä ingä wacä ingä waadete mini pön-
 nenguënënö ante edæ godongämæ cöwë waadete pön-
 nenguënëmini iminipa. Wadäni inänite në waadete pön-
 nengä iñömö tömengä iñömö Wængongui nänö, İmaï
 cæedäni, ante nänö wææ angainö ante do ëñente cæcä
 ingampa. ⁹ Tömëmi nämä bitö waadete pönënö ganca
 wacä ingante adoganca waadete pönencæbiimpa, ante
 Möitee wodi yewæmongacäimpa. Mänine adodeque ante
 ëñente cædinque waocä Wængongui nänö wææ angainö
 ante tömänö do iinque cæcampa. Edæ, “Bitö nänöogængä
 inämaï iñongante godö guëa mönämäi ie. Wacä ingante
 godö wænönämäi ie. Wacä nänö ëadincoo adinque godö
 ænämäi ie. Wacä wënæ wënæ cæcä atabopa, ante godö
 babæ wapiticæ apænedämäi ie. Wacä qui ante æinente
 wädämäi ie.” Mäninecoo Wængongui nänö wææ an-
 gainecoo ante bitö waadete pönëmi beyænque tömäne do
 iinque cætimpa. Ayæ quinemë godömenque wææ ante i
 mänine adobaï bitö waadete pönëmi beyænque tömäne
 do iinque cætimpa. ¹⁰ Në waadete pönengä iñömö edæ
 wacä ingante cöwë wiwa cædämaï ingampa. Mänömaï
 beyæ në ædæmö waadete pönënanique Wængongui nänö
 wææ angainö ante iinque cædänipa.

¹¹ İinque, Ñöwoyedë æbänö oo baquii, ante do
 ëñëninque minitö waadete pönente quëwëedäni. Edæ
 wëñëñedë mä mönö wede pönëñedë miinguipo mönö
 quëwenguimämo iñömö edæ mäniñedë edæ oo bacæ
 cædämaï ingatimpa. Ñöwo guiquënë, Oo pönï bacæimpa,
 ante pönente wædinque minitö möwocodë öñömini inte
 edæ ñäni ömæmöninque miimini quëwëedäni. ¹² Wëmö
 iñömö mönö wæwëmämo idæwaa edæ bapa. Miingui-
 poga ñäö baï baquinque edæ oque pönente impa cæmö.

Wëmö iñonte mönö wënæ wënæ cædö æmæwo wido cædinque, mönö wæætë ñäö iñömö quëwëninque edæ wææ cæquincoo wëñate bai cædinque nämä wææ gom-potawengæimpa. ¹³ Mänömaï cædinque mönö itædë quëwënömö inte nö pönï cæcæimpa. Baonique ante mönö cæinëwënö ante towënämaï inte mönö ti nämæ nanguï bete quidi quidi dowænämaï ingæimpa. Mönö wacä tönö godö guëa mönämaï, cænguï eyepæ cæninque godömenque nanguï cænämaï ingæimpa. Wæatedö wæætë piinte cædämaï inte mönö, Wacä bai bacæboimpa, ante piinte adämaï ingæimpa. ¹⁴ Wæætë wææ cæquincoo entawente bai cædinque mïnitö nämä wææ gom-potawencæte ante cædinque mönö Awënë Itota Codito ingante entawente quëwëedäni. Ayæ baonique ante mïni cæinëwënö ante wido cædinque, Æbänö cæte wënæ wënæ cæquimoo, ante cæcæte ante wædämaï iedäni.

14

Mïnitö tönïñädäni inänite piinte änämaï iedäni, ante

¹ Wacä wïi ædæmö pönengä incæte mïnitö, Mönö pönencabo imompa, ante pönëninque tömengä adocabocä nänö baquinque ämïni pongæädäni. Tömengä nänö pönënö ante wæatedö wæætë änämaï iedäni. ² Pancadäniya wede pönënäni inte cænguï adinque, Näwä cænguï impa, ante guiñënämaï inte quïëmë cænguï incæ edæ dobæ ade cænänipa. Wädäni guiquënë æmæ pönente beyæ, Tömää baö baacä impa, ante awente bai cædinque quingämenque baö incæ cænämaï inte onguipoiya pæcooque edæ cænänipa. ³ Incæte tömää cænguï në cænongä iñömö onguipoiya pæcooque në cænongä ingante piinte adämaï incæcäimpa. Wacä ingante, Bitö önömique bai inömi inte edæ awente cænämaï imipa, ante änämaï incæcäimpa. Ayæ wæætë onguipoiya

pæcooque nē cænongä guiquënë baö nē cænongä ingante, Baacä apa cæwëe, ante apænte ante piinämaï incæcäimpa. Edæ nē cænongä ingante Wængongui Ao äninque, Botö quimi imipa, ante do ængampa. ⁴ İñæmpa tömengä wacä awënë ingante nē cæcä iñongante bitö ædö cæte apænte ämii. Edæ tömengä awënë incæ, Waa cæbipa, angä wædinque edæ tömengä adiyæ tæï ongömaingampa. Wæætë adocä tömengä awënë, Wënæ wënæ cæbipa, angä wædinque edæ tæ go wææmaingampa. Incæte edæ tömengä mönö Awënë ingante nē cæcä iñongante mönö Awënë adocä incæ tæï piñængongä inte eyepæ cædinque edæ æænö gö cæcä tæï ongoncæcäimpa.

⁵ Ayæ wacä guiquënë, Pancaönaa godömenque waa ëönæpa, ante cæcäimpa, ante pönëñongante wacä guiquënë, Tömää itædë önönæque impa, ante pönengampa. İninque mönö pönencabo wacä wadö wacä wadö pönëmö incæte mönö tömämö iñömö edæ, Nämä botö pönënonque ante botö nö pönente cæcæboimpa, ante edæ mäninonque ante cæcæcäimpa. ⁶ Edæ, Pancaönaa godömenque waa ëönæpa, ante nē pönengä guiquënë tömengä mönö Awënë ingante waa adinque mänömainö ante cæcampa. Pancaönaa wii godömenque waa ëönæpa, ante nē pönengä guiquënë tömengä adobaï mönö Awënë ingante waa adinque mänömainö ante cæcampa. Baö nē cænongä guiquënë Wængongui ingante, Waa pönömi cæmopa, ante adobaï mönö Awënë ingante waa adinque cængampa. Baö ate nē awente cænämaï inongä guiquënë tömengä adobaï Wængongui ingante, Waa pönömi cæmopa, ante onguipoiya pæcooque cæninque mönö Awënë ingante waa adinque baö cænämaï ingampa.

⁷ Mönö pönencabo iñömonte æcämenque incæ nämä beyænque dicæ quëwengää. Dicæ nämä beyænque wængää. ⁸ Wæætë edæ quëwëmö ininque mönö Awënë

beyænque quëwëmompä. Wæætë edæ wæmö iinque mönö Awënë beyænque wæmompä. İinque quëwëmö incæ wæmö incæ mönö Awënë quimö inömö inte quëwëninque tömengä quimö inte edæ wæmompä. ⁹Edæ do wængainäni beyæ ante mïimö quëwëmö beyæ ante Codito tömämö Awënë nänö baquinque edæ wænte ñäni ömæmongacäimpa.

¹⁰ Bitö guiquënë bitö tönïñacä ingante ædö cæte apænte ämii. Ayæ bitö tönïñacä ingante, Önömique bai ïmipa, ante quïnante ämii. Edæ Wængonguï nänö apænte anguimpaa gäänë ongöñömonte tömengä tömämö ïmonte apænte ancæcäimpa cæbii. ¹¹Edæ Wængonguï beyæ ante iïmai ante yewæmonte ongompä.

“Mönö Awënë incæ, ‘Në Quëwëmö inömö inte edæ ämo ëñëedäni,’ angampa.

Ayæ, ‘Minitö tömämïni botö önöwa inö da guicapodique, Bitö Wængonguï inömi ïmipa, ante adoyömö apænecæminimpa,’ angampa.”

¹² Ante näni yewæmongainö bai iinque cædinqe mönö tömämö Wængonguï weca ponte ongöninque mönö pönengainö ante mönö apænegainö ante mönö cægainö ante tömengä ingante edonque pönï apænecæimpa.

Wacä oda cæcæcäimpa, ante cædämaï incæbiimpa, ante

¹³ Mänömaï beyæ mönö wacä ingante apænte änämaï ingäimpa. Wæætë minitö, Waa cæcæboimpa, ante nämä wææ cædinqe, Botö tönïñacä taadö nänö goquinö ante ee acæboimpa, ante pönëedäni. Tömengä tee tëwate bai oda cædämaï incæcäimpa, ante nöingä cæquinque ante pönencæminimpa. ¹⁴ Botö iñömö Itota Codito nempo quëwëmö inte edæ nöingä pönëninque, Tömää cænguï nämä incæ näwäaquiringä impä, ante do ëñëmopä. Incæte wacä, Pancaa cænguï baacä impä, ante në pönengä inte

tömengä beyä baacä iñonte tömengä nänö, Baacä impa, änö cænämaï inguënegä ingampa.

¹⁵ Bitö quingämë cämi adinque bitö tönĩñacä, Baacä apa cæwëe, ante wæwente bacä ïninqe bitö waadedämaï inte godömenque cämaïmipa. Edæ bitö tönĩñacä beyä Codito wængacäï apa quëwëe. Bitö tönĩñacä nänö pönënamäï bate wænguinque baö cämipa, ante wædinque bitö tömengä ingante näwangä waadete pönëmi inte tömengä beyænque ante cöwë baö cænämaï incæbi-impä. ¹⁶ Botö mänömaï cædinque waa pönĩ cæbopa, ante pönëmi incæte wadäni bitö waa cædö ante, Wíwa cæbipa, ante pönö babæ ante tedewënäni ate wædinque bitö wæætë waadete pönëninque wææ ämi tedewënämaï incædänimpä. ¹⁷ Wíi cænguinque ante wíi bequinque ante Wængonguï nempo quëwëmompä. Wæætë Wængonguï Tæiyä Waëmö Öñöwoca nempo quëwëñömonte tömengä pönö cæcä æninque mönö nö entawenguinque impä. Ayä mönö gänë pönenguinque ante mönö watapæ tote quëwenguinque ante tömengä nempo quëwëmompä.

¹⁸ Edæ Codito nempo quëwëninque waocä mänömaï cæcä adinque Wængonguï tömengä ingante waa ate tocampa. Waodäni adobäi, Waa cæbipa, ante waa adänipa.

¹⁹ Mänömaï impä, ante adinque, Mönö pönencabo godongämæ piyænë cæte quëwengæimpä, ante, Ayä mönö godongämæ wede pönëninque tæi mäenonte baï ongongæimpä, ante mönö nanguï cæcæimpä. ²⁰ ïninqe cænguï cæïnente beyænque bitö Wængonguï nänö në badongäinäni inänite bæ tadämaï incæbiimpä. Tömää cænguï edæ näwaaquingä impä. Incæte bitö cæninö beyænque wacä ëñënamäï inte tee tëwate baï oda cæbaingampa, ante do ëñëmi inte bitö godömenque cämi ïninqe wíwa cæbaïmipa töö. ²¹ Waa cæcæte ante bitö iïmaï cæcæbiimpä. Bitö baö cämi beyä, biïnömæ näni wædænque tí nämæ bebi beyä, quïëmë cæbi beyä bitö

töniñacä oda cæte wæcantawo. Ìninqe bitö iñömö, Botö töniñacä oda cædämaï incæcäimpa, ante wææ cædinque ee cædämaï ïmi ïninqe waa ïmaimpa.

²² Mäninö, Æbänö cæte waa inguiï, ante bitö pönönö beyænque wadäni inänite apænte änämaï inte bitö adobique inte Wængongui ayongante cæcæbiimpa. Waa cæquiï impa, ante mimöno bitö pönënonque ante mäninonque cædinque bitö tente wæquinque cædämaï inte waa tobaïmipa. ²³ Wæætë nê æmæ pönengä guiquënë, Cæmo beyæ Wængongui pangä wæcæ wæ, ante wædingä inte tömengä nämä nänö apænte pante wæquinque ade cængampa. Edæ æcänö wede pönënämaï inte cæda tömengä nänö cædönö tömänö edæ wiwa cætimpä. Ìninqe bitö cædö tömänö wede pönente cæcæbiimpa.

15

Wadäni incæ watapæ quëwencædänimpa, ante cæe, ante

¹ Mönö nê wede pönëmö iñömö täï piñænte entawëmö inömö inte nämanque ante mönö cæinënö ante edæ wædämaï ingæimpa. Wæætë edæ nê æmæ pönënäni guiquënë tömënäni aquïï pönï inäni inte, Ædö cæte cæquimoo, ante wædäni adinque mönö tömënäni wædö ante ænte mongænte bai cædinque tömënäni tönö iñacabo cæcæimpa. ² Godongämæ godö cæmö æninqe waa todinque tömënäni wæætë wede pönëninque oncö täï mänonte bai täï ongoncædänimpa, ante mönö ædæmö cæcæimpa. ³ Edæ mönö Codito incæ nämanque ante nänö cæinënö ante cæcæte ante edæ wædämaï inte piyänë cægacäimpa. Wængongui ingante do näni apænegainö bai tömengä wadäni beyænque ante cægacäimpa. “Wængongui ëñëmi. Wadäni bitö ïmite piïnte badete tocæte ante cædinque botö ïmote wæætë piïnte badete

todänipa,” ante apänete bai Codito ee cægacäimpa. ⁴Edæ mönö imonte odömonte apänetæte ante Wængongui angä ëñëninque dodäni tömanta yewæmongadänimpa. Ìninque mäninta ædæmö adinque wampo pönëninque wæntædämaï inte ee cæmö ïninque edæ mönö, Watapæ bacäimpa, ante pönente tocäimpa.

⁵ Ìninque Codito Itota miñæ tee empote goyömonte Wængongui iñömö edæ, Minitö wampo pönëninque wæntædämaï inte ee cæcæminimpa, ante në ædæmö cæcä ingampa. Tömengä mänömaï pönö cæcä ate minitö iñömö adoyömö ante mini pönencabo bacæminimpa, ämopa. ⁶ Mänömaï bamini ïninque minitö äanque bai adodö ante pönëninque iïmaï ante Wængongui ingante apänetæminimpa. Mönitö Awënë Itota Codito Mæmpobi iñömi inte bitö tömengä Wængongui adobi ïmi iñömö bitö tæï ëmömi inte ñäö apäite bai ïmi amönipa, ante adoyömö ante apänetæminimpa, ante botö mänömainö ante yewæmömopa.

Oodeoidi inämaï inäni ëñencædänimpa, ante

⁷ Codito minitö iminite Ao ante ængacäimpa. Ìninque tömengä minitö iminite nänö ængaï bai minitö adobai wacä ingä wacä ingä godongämæ Ao ante æedäni. Mänömaï cæmini adinque wadäni Wængongui ingante apänedinque, Bitö waa pönï cæbi amönipa, ante watapæ pönï apänetædänimpa. ⁸ Edæ apænebo ëñeedäni. Mönitö mæmæidi inänite Wængongui, Minitö beyæ pönö waa cæcæboimpa, angacäimpa. Ìninque, Wængongui tömengä nänö angainö ante cöwë cæcæcäimpa, ante oodeoidi ëñencædänimpa, ante cædinque mönö Codito tömënanï beyæ në cæcä bagacäimpa. ⁹ Tömengä iñömö, Idægoidi inämaï inäni incæ Wængongui ingante, Bitö ñäö bai ëmömi inte pönö waadete waa cæbi æmönipa, ante

apænecædänimpa, ante mänömaï cægacäimpa. İïmaï ante Wængongui beyæ nani yewæmongainö bai impa.

“Botö mänömaï beyæ, Bitö æbänö në waa cæbi imii, ante idægo inämaï inäni weca gote apænecæboimpa.

Bitö emöwo ante ämotamini watapæ pöni ancæboimpa,” ante nani yewæmongainö bai Codito cægacäimpa.

¹⁰ Ayæ wataa inömo iïmaï ante yewæmongatimpa.

“Idægoidi inämaï imini incæ minitö Wængongui quinäni tönö godongämæ watapæ toedäni.”

¹¹ Ayæ wæætë,

“Idægoidi inämaï imini mönö Awënë ingante apænedinque, Bitö waa pöni cæbi amönipa, ante watapæ pöni apæneedäni.

Wamini mini cabo mini cabo tömämini ämotamini ante bai apænedinque, Waa pöni cæbi amönipa, ante watapæ pöni apæneedäni.”

¹² Itaiya wodi adobainö ante yewæmongacäimpa.

“Inguipoga quëwänäni tömänäni Awënë baquinque Awænguinto tä bocate bai cædinque Yæte Pæingä inömo ængæ ganticæcäimpa.

Tömengä cæcä beyænque watapæ bacäimpa, ante idægoidi inämaï inäni incæ pönencædänimpa,” ante Itaiya wodi yewæmongacäimpa.

¹³ Wængongui inömo, Watapæ bacäimpa, ante në badongaingä inongä inte iïmaï cæcæcäimpa, ämopa. Tömengä Tæiyæ Waëmö Önöwoca tæi piñante cæcä ate minitö, Watapæ bacäimpa, ante godömenque wede pönencæminimpa. Mänömaï cæcæte ante cædinque Wængongui pönö apænecä ëñëninque minitö tömengä ingante wede pönëninque edæ gänë entawëninque watapæ tocæminimpa, ämopa.

¹⁴ Botö töninämäni ëñeedäni. Botö tömömo ayömote minitö në waa cæmini imini abopa. Ayæ, Æbänö waa

cæquii, ante do eñēmīni imīnīpa. Ayæ adobai mīnitō eyepæ imīni inte wacā ingā wacā ingā do odōmonte apænemīni imīnīpa, ante pōnēmopa. ¹⁵ Inīnque botō, Mīnitō eñēnīnō ante mīnitō ocāi encadōmīni inte edæ adodō ante pōnencāmīnīmpa, ante bai cædinque pancadea ante yewæmontabopa. Botō iñōmō Wængonguī waadete pōnō cæcā ænte nē entawēmo inte mănōmaīnō ante yewæmōnīnque edæ guīñēnāmaī inte nanguī ante yewæmōmopa. ¹⁶ Edæ tōmengā waadete pōnō cæcā ænte entawēnīnque botō Itota Codito beyænque ante idægoidi ināmaī ināni inānite nē cæbo badīnque Wængonguī ingantedō ante watapæ apænebo eñēnānīpa. Mănōmaīnō ante apænebo eñēñōmīnīte Wængonguī Tæiyæ Waēmō Önōwoca pōnō badongā ate idægoidi ināmaī ināni incæ tæiyæ waēmō ewocate quēwēnāni badānīpa. Mănōmaī bayōnānite botō iñōmō, Wængonguī quī, ante pædæ godōnāni bai cædinque tōmēnāni inānite ante edæ, Wængonguī quīmīni bacāmīnīmpa, ante pædæ godōmo ænīnque Wængonguī wæætē waa tocampa.

¹⁷ Mănōmaī beyæ botō Itota Codito nempo quēwēnīnque Wængonguī beyæ cædinque edæ nanguī tobopa. ¹⁸ Codito botō tōnō guēa cæcā beyænque botō nanguī apænedīnque nanguī cæbo ate tōmengā iñōmō tōō æmængā pōnīnque edæ idægoidi ināmaī ināni incæ edæ Wængonguī ingante eñēnte cædāni badānitapa. Botō Codito mănōmaī botō tōnō nānō cædinō ante apænedīnque edæ mānīnque ante apænedīnque guīñēnete wædinque godōmenque apænedāmaī incæboīmpa. ¹⁹ Wængonguī Tæiyæ Waēmō Önōwoca tæi pīñængā inte botō tōnō godongāmæ cæcā ate botō, Eñencædānīmpa, ante bamōnengæ cæbo ate nē pōnēnāni badānitapa. Mănōmaī Eedotadēe iñōmō mā cæte godīnque Idīdiabæ ganca tōmāo godāmæ godīnque

botö Codito ingantedö ante watapæ apænedinque adodö adodö ante tömänö ante apænebo ëñënanitapa.

²⁰ Botö, Codito ëmöwo ante wadäni näni apænedämaï iñömö gote tömengä ingantedö ante watapæ apænebo ëñencädänimpa, ante cöwë goinente wætabopa. Wacä onguitanca nänö tæñönincönë æmonga mænönämaï incæboimpa, ante bai cædinque botö, Wacä do nänö apænediñömö botö wæætë apænedämaï incæboimpa, ante cætabopa. ²¹ Wæætë iïmaï ante Itaiya wodi nänö yewæmongainö bai cætabopa.

“Tömengä ingante ante ëñënämaï iñinäni incæ edæ do ate bai ëwocæcädänimpa.

Önömonca ëñënämaï iñinäni incæ edæ, ‘Æbänö i,’ ante do ëñencädänimpa.”

Ante nänö yewæmongainö bai botö, Ëñencädänimpa, ante cætabopa.

Odömä iñömö pöinëmopa, Pabodo angampa

²² Mänömaï beyæ botö mïnitö weca poncæ cæyömote edæ, Wææ cæte i, ate wædinque pönämaï intabopa.

²³ Iñömö ömæ idæwaa cæbo inte botö æpomë wadepo iñonte mïnitö imïnite aïnente wædömopa. ²⁴ Iñinque botö, Iñincayæ ate Epäñabæ gocæ cædinque wodo tebæ godinque mïnitö weca ëñate aboque gocæboimpa, ämopa. Edæ botö wantæpiyæ ëñate tote quëwente ate godömenque Epäñabæ gote cæyömo mïnitö botö beyæ cædinque da godömiini gocæboimpa.

²⁵ Nöwo guiquënë botö täno Eedotadëë iñömö Wængonguï quïnäni beyæ godö cæcæte ante gobopa.

²⁶ Wængonguï quïnäni incæ Eedotadëë quëwënäni pancadäniya ömæpodäni inte wædänipa, ante pönente wædinque wabæca Mäatedöniabæ quëwënäni tönö Acayabæ quëwënäni tönö, Mönö da godö da godö cæcæimpa, ante pönëninque watapæ todinque tömënäni,

Wængonguī quīnāni quī, ante do godōnānitapa. ²⁷ Mānōmainō ante watapæ pōnente cædāni incæte tōmēnāni Eedotadēē iñōmō quēwēnāni inānite nē godonguēnēnāni inte da godōnānimpa. Edæ Wængonguī Ōnōwoca nānō pōnongaincoo ante idægoidi pōnō apænedāni ēñente ænte ēwocadināni inte wabæca quēwēnāni iñōmō tōmēnāni nāni ēadincoo incæ idægoidi beyæ ante wæætē godonguēnēnāni badināni inānipa. ²⁸ Ininque botō iñōmō mānincoo tōmēnāni nāni da godōnincoo idægoidi weca ænte gocæboimpa. Godinque botō cōwā adinque, Nē ōmæpodāni inte nē wædānique æncædānimpa, ante wææ cæcæboimpa. Ædæmō cæbo ænāni ate botō māniñedē ate Epāñabæ gocæte ante cædinque mīnitō ōmæ wodo tebæ godinque mīnitō weca ēñacæ poncæboimpa. ²⁹ Codito pōnō waa cædinque da pōnongā pōninque botō cōwē tōmengā tōnō waa pōni botō cæquinque mīnitō weca poncæboimpa, ante do ēñēmopa.

³⁰ Botō tōniñamīni ēñēedāni. Botō pæ pagænte bai nanguī cæyōmote mīnitō iñacabo cædinque botō beyæ Wængonguī ingante nanguī apæneedāni, ante botō mōnō Awēnē Itota Codito beyænque āninque ayæ Wængonguī Ōnōwoca nē waadete pōnengā beyænque āninque mīnitō iñiñite nanguī āmopa. ³¹ Oodeabæ pōnēnāmaī ināni iñōmō Pabodo ingante wēnæ wēnæ cædāmaī incædānimpa, ante botō beyæ ante apæneedāni. Ayæ, Eedotadēē iñōmō botō gote cæbo adinque Wængonguī quīnāni incæ botō cædō ate Ao ancædānimpa, ante apæneedāni. ³² Mānōmaī i adinque botō, Awēnē Wængonguī angā ate botō watapæ todinque mīnitō weca pōmo ate mōnō godongāmæ guēmāninque wampo pōnengæimpa, āmopa. ³³ Wængonguī nē gānē pōnengā inte mīnitō tōnō godongāmæ ongōninque pōnō cæcā ate gānē

pönencæminimpa, ämopa. Mänömaï impa diyæ, ante botö, Amëë, ämopa.

16

Waa quëwencæminimpa, ante

¹ Botö iïmaï ämopa. Mönö tönïñacä tömengä ëmöwo Pebe mïnitö weca ñöwo poncæ cæcampa. Tencodea iñömö Codito ingante nani godongämæ pönencabo iñönänite tömënanï beyæ në waa cæcä inte iingä onquiyængä iñömö waingä pönï ingampa. ² Tömengä nanguï inäni beyæ wææ gompodinque waa cædongä inte botö beyæ adobaï nanguï cæcantapa. Ìninqe edæ botö mïnitö imïnite iïmaï ämopa. Wængonguï quïmö inömö inte mönö Awënë nempo quëwëñömonte Pebe adocä inte adobaï ingampa, ante adinque mïnitö tömengä ingante waa adinque Ao ante æedäni. Ayæ tömengä quïëmë æïnente wæcä iñongante mïnitö wæætë edæ godö cæedäni ämopa.

³ Ayæ wada Piditida tönö Aquidæ nana gæncaya iñömö Itota Codito nempo quëwëninque edæ botö tönö godongämæ cæda inapa. Ìninqe mïnitö tömëna inate, Waa quëwencæminäimpa, ante botö beyæ ante apænemïni ëñëcædaimpa. ⁴ Wadäni botö imote wænoncæ cædäni wæyömote tömëna nana wodo wænguinque edæ botö imote wææ cædatapa. Mänömaï cædapa, ante botö tömëna inate waa ate pönente apænebopa. Ayæ idægoidi inämaï inäni Codito ingante nani wayömö pönencabo wayömö nani pönencabo adobaï tömänäni Aquidæda nana cædinö ante ëñëninque tömëna inate waa ate pönëninque apænedänipa.

⁵ Ayæ Itota Codito ingante në pönënanï Aquidæda oncönë godongämæ pö guïdäni inänite, Waa quëwëedäni, ante apænemïni ëñencædänimpa. Botö æmigo Epëneto

botö nē waadecä iñongante mīnitö botö beyä apäneedäni. Atiabē iñömö Codito ingante wadäni pönēnāmaī iñönāni tōmengä iñömö tāno pönengantapa. ⁶ Ayä Māadiya mīnitö beyä nanguī cædingä iñongante mīnitö wæætē tōmengä ingante Waa quēwencæbiimpa, ante apäneedäni. ⁷ Botö guidēna Antodönico tönö Ñōniato iñömö botö tönö godongämæ tee mönete wædīna īnāpa. Tömēna iñömö botö pönēnāmaī iñömote wēēnēñedē Itota Codito nempo quēwēna iñōnate Codito incæ tōmēna īnate da godongacäimpa. Īnīnque, Itota Codito nänö nē da godongäina tānoda īna adīnque mīnitö botö beyä ante tōmēna īnate waa apäneedäni.

⁸ Ayä wacä mönö Awēnē nempo quēwēnīnque Ampidiato ingante waadete pönēmo inte edæ botö, Waa quēwencæbiimpa, ämopa. ⁹ Ayä adobaī Odömāno mönitö tönö godongämæ Codito nempo quēwente nē cæcä iñongante, Waa quēwencæbiimpa, ante botö beyä ante apäneedäni. Botö nē waadecä Etaquito ingante adobaī ante apäneedäni. ¹⁰ Ayä Apede iñömö Codito nempo quēwēñongante tōmengä æbänö cæcää, ante adīnque Codito tōmengä ingante wæætē, Waa cæbi abopa, angampa. Tōmengä ingante botö beyä ante waa apäneedäni. Ayä Aditobodo nāni quēwencabo īnānīte adobaī waa apäneedäni. ¹¹ Botö guidēngä Edodiyaönö ingante waa apäneedäni. Ayä Nāadotito guidēnāni incæ æcänö mönö Awēnē nempo quēwēna tōmēnāni īnānīte adobaī, Waa quēwencæminīmpa, äedäni.

¹² Ayä wada mönö Awēnē nempo quēwēna onquiyæna Tidipīna tönö Tidipota iñömö nē nanguī cæda īnāpa. Tömēna īnate botö beyä ante waa apäneedäni. Ayä wacä onquiyængä mönö nē waadecä Pedetida iñömö tōmengä mönö Awēnē nempo quēwēnīnque nanguī cæ-

cantapa. Tömengä ingante adobaï, Waa quëwencæbi-
 impa, äedäni. ¹³ Ayæ mönö Awënë nänö nē apænte æn-
 gaingä Odopo ingante waa apæneedäni. Tömengä badä
 incæ adobaï botö badä baï iñönante tömënä inante botö
 beyæ ante waa apæneedäni. ¹⁴ Ayæ adobaï Atincodito,
 Pedegonte, Edëme, Patodobato, Edëma tömënäni nāni
 pönencabo tömänäni inänite, Waa quëwencæminimpa,
 ante apæneedäni. ¹⁵ Ayæ wadäni Pidodogo tönö Oodia,
 Nēedeo tömengä mængä tönö, Odimpa tönö Wængongui
 quinäni tömänäni inänite, Waa quëwencæminimpa, ante
 apæneedäni.

¹⁶ Edæ, Waa quëwencæminimpa, ante minicabo incæ
 tömämäni godongämæ waa waadete apænecæminimpa.
 Codito ingante wayömö nāni pönencabo wayömö nāni
 pönencabo tömänäni mīnitö iminite wæætë, Waa
 quëwencæminimpa, ante änänipa.

¹⁷ Botö tönñamäni ëñeedäni. Mīnitö adocabomäni
 iñöminite wadäni æmæmoncadö æmæmonca pä cädäni
 inänite cöwä adinqe edæ Baa äedäni. Doyedë mīnitö
 ëñenö ante ëñenämaï inäni inte tömënäni, Mīnitö tee
 tēwate baï oda cæcæminimpa, ante cædinque wadö
 ante edæ odömönänipa cæminii. Tömënäni inänite
 gomö aquënë cæminii. ¹⁸ Mänömaï cädäni iñömö
 mönö Awënë Codito ingante cädämaï inte nämä nāni
 cæinēnonque ante cädänipa. Tömënäni ante, Mīnitö
 iminite waa amönipa, ante waa tedete baï tededäni ëñen-
 inque pancadäniya guiquënë, Babæ wapiticæ impa, ante
 cöwä adämaï inäni inte, Nö impa, ante do pönänänipa.
¹⁹ Mīnitö cöwë ëñente cæmini iminipa, ante tömänäni
 do ëñänänipa. Mänömaï beyæ botö iñömö nanguï to-
 bopa. Incæte, Quinö waa cæquii, ante mīnitö ædæmö
 ëñencæminimpa, ante ainëmopa. Quinö wënæ wënæ
 cæquii, ante edæ ædæmö ëñenämaï inte edæ gomö
 acæminimpa, ante ainëmopa. ²⁰ Wængongui, Gänë pö-

nente quëwencæminimpa, ante në pönö cæcä iñömö edæ Tatäna ingante minitö önöwa gäänë wæantodongä ate minitö wæætë do pīnā gāwate bai cæcæminimpa. Ñöwo iñömö mönö Awënë Codito nänö waadete pönö cædö incæ entawencæminimpa, ämopa.

²¹ Botö tönö guëa cædongä Tímoteo iñömö minitö iminite, Waa quëwencæminimpa, angampa. Ayæ botö guidënanī Dotio tönö Yatönö adobai Totipatedo adobai minitö iminite, Waa quëwencæminimpa, änanīpa.

²² Ñöwo botö Tedetiyobo iñömö Pabodo önöneque tedecä ëñëninque iī cadota ante në yewæmönimo inte botö adobai, Waa quëwencæminimpa, ämopa.

²³ Gayo adobai minitö iminite, Waa quëwencæminimpa, angampa. Tömengä oncönë Codito ingante nani pönencabo cöwë godongämæ ponte apænedänīpa. Ayæ tömengä botö imote adobai, Pöe, angä ëñëninque edæ botö ñöwo tömengä oncönë owobopa. Ayæ iñömö quëwënani awënë nänö äinta äninque adocanque Edaato nani änogä iñömö tömengä, Tömänani beyæ æbänö cæquii, ante në angä iñömö tömengä tönö mönö tönīñacä Coadoto adobai, Waa quëwëedäni, änapa.

²⁴ Mönö Awënë Itota Codito minitö iminite pönö waadete cæcæcäimpa. Mänömaī impa, ante botö, Amëë, ante ämopa.

Wængonguī ingante waa ate apænecäimpa, ante

²⁵ Ñöwo iñömö Wængonguī ingantedö ante watapæ botö apænedö ante ayæ Itota Codito ingantedö ante mönö apænedö ante në pönëmini inte minitö tæi pīñante ongoncæminimpa. Wængonguī eyepæ inte mänömaī pönö cæcæcäimpa. Tömengä mäninö ante ñöwo tæcæ nänö odömönö ante wëenëñedë pedämämo iñonte cöwë wantæpiyæ wë wodonte bai cægacäimpa.

²⁶ Ñöwo quiqënë, Codito æbänö cægacäi, ante inguipoga

tömämæ quëwënnäni ëñente wede pönëninque botö ïmote ëñente cæcädänimpa, ante cædinque Wængonguï cöwë në Quëwëngä inte do odömongä acäimpa. Tömengä angä ëñëninque tömengä beyæ në apænegaïnäni wæætë edonque pönï yewämönäni acäimpa.

²⁷ Ìninque Wængonguï nö pönï ëñëngä inte adocanique Wængonguï ingampa, ante adinque mönö, Bitö adobique ñäö bai ëmömi inte edæ waa cæbi amönipa, ante mönö Itota Codito ëmöwo apænedinque Wængonguï ingante edæ cöwë apænecäimpa. Mänömaï impa diyæ, ante botö, Amëë, ämopa.

Wængongui nänö Apänegainö
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30
